

EDGAR CLERBOIS

# DI RIMÈ

**Skri kom on l'pal  
in walon-pikâr dèl Louviér  
è d'ko pu lon**

Inprimè à L'Louviér  
I. C. I. In 1942











DI RIMÈ





EDGAR CLÉRBOIS

# DI RIMÈ

**Skri kom on l'pal  
in walon-pikâr dèl Louviér  
è d'ko pu lon**

Inprimè à L'Louviér  
I. C. I. in 1942





## Avèrtins.

Lè di rimè k' vo dalè asprouvé d' lîr, Fré Walon, son skri t'tafé kom on pal, avû lè minmè lèt, apôprè, k'in fransè, k'in flamin, k'in alman ou k'in inglè.

Vo srè potèt sézi in vyan sakan mo : « **kan, ki, tâblô, frékanaté, gèrnî, nwâr** ». Vo dit : « **tram** » in fzan souné l' **m**, poukè 'n dirî nî : « **om, kom, Rom, fum, feùm, mam** », in l' fèzan intint ètou ?

Dju sé bî kè skà mètnan on a skri in walon kom in fransè : in mtan 'n mas dè lèt inutil k'on n'intin nî. Mè 's kè l' walon n'a nî l'ér insi d'yèt dou fransè spotchî tou rinpli d' fôt ? Pourtan, l' walon-pikâr, kè no parlon, èyè l' fransè, sè dè-z-ariér pèti kouzin ki n' s'èrchèntè pu.

Ravizè dè mo fransè kom : « **lance, encre, jambon, emporter, paon** » : vo vyè k'on a skri l' son **an** d' chon sort. Pou « **in** » sè l' minm : **matin, pain, ceinture, examen**. Eyè « **s** » : **sang, rousse, science, soixante, nation** ».

Poukè ? Pou moustré leû parintéy avû l' latin ou l' grèk.

No n'avon nî afé d' sa.

In fransè, on di 'n minm lèt, tékfwà d' twâ kat maniér ! Vo pinsè k'on di « **a** » l' minm din : « **grasse, valse, rage èyè table** » ? Vo vo trompè. Eyè « **o** » : din : **cor, sot, interroge, fosse, un os, des os** » ? Vo vo trompè ko ètou.

Eskè n' sroû nî pu fasîl k'èn lèt n'uch fok k'in son ?

Lijè **tou wô** in fzan **bî** intint **tou lè lèt**, sa dira tou seû : **sou, soul, soup, soûr, soût, tou, tout, toûr, tous tourn, fon, font, fons** ; **Tin, timp, tinr, lint** ; **mâren, dalé a skrèn, on fèn** ; **sè, ès, s'èst** a vou (fé intint « **s** » ; èyè « **t** » din **s'èst**, kom din lè mo : « **Est, Ouest** ».

I ya in arnok : lè vwayèl din s' nè : « **an, on, in, un** ». I fô skrîr deû lèt pou In son.

Lè-z-Espaniol mètè l' « **n** » pa dzeûr : **â, ô, î, û**.

Ottan 'n sort kè l'ôt l

D'é chwazi « **an, on, in, un** », kom in fransé, mè, atinsion ! si ya 'n vwayèl ou bî in rapèl aprè **n**, vo frè intint lè deû lèt.



On di : in **bon** pidjon, mè : èn **bon'** pron' ;  
 èl djonnès, mè : dou boneûr ;  
 in gran fènèyan, mè : **Jan'**, èn **fyan'**, èn **kan'** ;  
**annyî**, mè : in **ania** ;  
 èm pèti kin î **fin** kontin, mè : i ya deû bobin' dè  
 nwâr filè a l' **machin'** a keût ;  
**kinkin**, **kinkè**, mè : **machinis**, **advinèt** ;  
 tou lè **pun** son wastè, mè : s'in d'è yeùn'.

I fourou ko potèt parlé dou « **y** » : s' n'è jamé **i**, sè l' son  
 k'on intin din l' « **ja** » dè Flamin èyè l' « **yès** » dè-z-Inglè. Eyè  
 dou « **g** » k'on n' di jamé « **j** ».

Si tou sa vo chèn èn miyèt drol d'in preûmî n' vo lyè nî  
 inronchî. Pasè ô trèvi d' tou lè buchon, minm si y a dè spèn l

Poukè s' k'on n' chwaziroû nî in kou pou tout l'èkriur  
 dè son ? D'in preûmî èl pokra potèt vo-z-î m'èl parlèra a vo-  
 z-orèy, èl kantra !

Sè bî k' kan on a kouminchi a skrîr in fransè, in pikâr èy'  
 in walon ô 11<sup>e</sup> èyè ô 12<sup>e</sup> siék, on l'la fé kom on parloû a  
 s' tan la ?

S' n'è k' branmin pu târ, invî lè kators kins sin, k' dè  
 malin on rabiî lè mo fransè avû lè bèlè lok dou latin èyè dou  
 grèk, pask'on daloû ké 'n mas dè mo a prèsté dè sè kostè la.

Mè dèspû adon, i ya toudi yeû dè Fransè pou dmandé  
 k'on skrîvis t'tafé kom on pal. L'Akadémîy n'a jamé volu  
 lè-z-askouté.

Sè pou sa k'no n'yavnon jamé, in lijan, pou aprint a bî  
 parlé in fransé.

Si tou lè Walon 's mètrin't a skrîr kom i paltè, vo vîrî  
 k'on aroû dou plézi a lè lîr !

Mè, in vla 'n ton' avû sa l

Lijè mè « di rimè » in ouvran tou gran vo deû-z-î èyè vo  
 bouch, è k'èl bon Dieû vo bènîs èyè lè pun d'sin Djan !

A L' Louviér, ô mwa d'awout in 1942.



## No konvnanans pou skrîr lè son tou djus.

1. 7 vwayèl : **a, è, i, o, ou, eu, u**, kom in fransè.

On pû yèt brèf in lè dzan : **à, è, î, ô, ou, eù, ù** ; ou bî on asplouy, èyè on dmeûr pu lômin pou lè dîr : **â, é, î, ô, ou, eû, û**.

Avû dè majuskul s' sra toudi **A, E, I, O, Ou, Eu, U**.

No ston télmin abitwè avû lè twâ tchiroupèt dou **e** : **é, è, ê**, kè dju n' lè-z-é nî kandjî.

In parlan dvin s' nè on di : **an, on, in, un**, kom in fransè è kom si n'yarou fòk k'èn lèt.

2. 7 konson' : 7 dûr èyè 7 mol :

**k — g**, kom din **Kamil, Gus** ;

**t — d**, kom din **Tèrés, Dodol** ;

**f — v**, kom din **Florin', Valèr** ;

**ch — j**, kom din **Chal, Jul** ;

**s — z**, kom din **Sélin', Zidor** ;

**r — l**, kom din **Rawoul, Lèyon** ;

**p — b**, kom din **Polit, Bèr**.

3. 4 konson' a pâr :

**m — n**, kom din **Mèlîy, Norè** ;

**w — y**, kom din **Walon, yoûr. nwâr, wat, ayér**.

Atinsion ! 'N dit jamé « **i** » kan vo vîrè « **y** » (yeù) : **yâr, yordi, yeùn', yun, yènu, gayol, payi, payè, èskayè, koyi, kuyér, gayi, boutèy, way, kanay, gay, brây, i pây, i pîtèy, î krîy**,

Si on sroû bî abitwè avû « **y** » on skrîroû : **many, dèmany, pany, sany, kavany, Tousany, plany**. Mè pou n' nî tro pokî lè-z-î dè Walon, ki on apri a lîr in fransè, dju skrîré : **mangn', dè-mangn, sangn, kavangn, i gangn, Tousangn, plangn, èn lign, i rlign**. Sè drol, poutan !

Lè-z-Espaniol on fé ôtremin, yeûs, pou skrîr èl son k'no rprézinton pa deû lèt : **gn**. Il on mi in pti kafouyâch pa dzeûr **n**. Il loutmè sa : « tilde ». I skrîftè : **España, Español**.

4. In rapèl : ' **l** = èl ; ' **m** = èm ; ' **s** = ès.

Ɔ In louyin : - deû-z-û ; leû-n-om.

6. Fé souné tou lè lèt : **ra, raf, râr, ras, râz, rat, rât, ram, rak, ratch, radmin ; ko, kof, kôf, kot, kôt, kos, kôs, kol; kom, kit, kwit, kwich, kors, korn, kort, skors, i skorch, koy, raskoy; raskay, chikay.**

7. On n' sè chér fok d'èn lèt, a pâ : **an, on, in, un, ch, gn,** pou rprézinté in son.

No-z-avon rwè a gay : **c, ç, qu, x.**

**G »** n'è jamé l' minm kè **« J »** kom in fransè : **gamin, ganp, goyi, gugus, i gonfèl, gangni (gannyi), gigni (ginyi), i rign, èn grign, in grign din, ès gèniou, sè g'niou ; Jèlik, Jorch, jimnas.**

No n' kounichon ni **« h »** nèrî.



*El Kanson dèl Nûit.*





## Nût dè Nowé.

Nowé ! Nowé ! On krîy ô skoûr,  
On krîy, on krîy tou sè pu foûr,  
On poûs si foûr oûr dè s' goyî  
K'sa mont., èskin wô dou stwalî !

L'eûlô, on ll'a intindu,  
L'estwal ô stwalî on ll'a vu.  
Sè dè-z-om, dè mâch k'on vu sa,  
Dè-z-om atirè pa s' kri la !

Il on koureû par si, par la.  
Avû dè stwal dèsu leû tièt,  
T'tôlon dè kmin èyè dè siék,  
Pou no fé vîr 'n miyèt pu klér !

I no-z-on dnè tou leû richès :  
S'î d' l'oûr, dèl mîr èyè d' l'ansan ;  
I no-z-on surtou dnè dou pangn  
Lidjér, dorè kom dè kuniol !

Lè bièt al krèp : sa vo chèn drol,  
Yeûs ètou don'tè tou s' kèl-on :  
Leû n'alèn, leû fors, leû châr, leû san,  
Kom Jézu, li, kan i sra gran !

No vivron mieù din no mézon,  
Ki n' sron pu parèy a dè stôl,  
Pusk'on a fé vni pou rnètyî  
El pèti Jézu d' Bètlèyèm.

Eyè kan no-z-aron tou sa,  
Tou sa, tou sa, sou k'on a dja :  
El chikay èyè lè kostum,  
Lè bia kapia, lè bèlè plum,

El kèrbon, èl vapeûr, l'asi,  
Du kouran k'on aminn doûsi  
O d'bou d' vo doû è d' vo-z-osti :  
Vo bwéy s' fra bi tout seûl insi !

No n' dèmandron pu ô bon Dieû  
Ki don' « notre pin kotidyin ».  
No n' diron pu a ku tou nu  
Kom èl bia pti infan Jèzu.

M'i no foûra toudi 'n sakè,  
Paskè lè-z-om sonchtè pal nûr,  
Pa lè lonkè nûr dè Nowé,  
Kan i son la, abandonè.

I pinst in s' sintan tou miér seû,  
Ki fô pu k' sa pou yèt eûreû !  
I soncht ô trèfon d' leû pinséy :  
Nowé ! Nowé ! Fô yèt dè fré !

Nowé ! Nowé ! On krîy ô skoûr ;  
On krîy, on krîy tou sè pou foûr.  
On pòûs si foûr oûr dè s' goyî,  
K' sa mont... èskin wô dou stwall !



## II.

### El Nût.

I n' fô nî dîr dou mô dèl Nût  
Sè 'n saki ki no vwa voltî ;  
El vî d' lé nou a s'n abîtût  
In dalan su l' pwint dè sè pî !

El no dèsbîy, rsak no botin',  
Pou mèt a leû-n-és no deû pî ;  
El nè vû pu k'no ragidin',  
Eyè 'l mè 'n mangn su no deû-z-î.

Avû l'ôt èl no fé 'n karès,  
No don' in bètch... no raskouvri...  
El mous k'on n' pouûra pu fé 'n djès  
Pou k'on n' rinveyis nî 's pèti !

El djoû vo-z-avoû mi d'astanp,  
I vo fzoû kouri, pitoté,  
Vo mtoû dè fourmich din vo ganp  
S'i kom pou vo fé inbété.

Mètnan, pindan k' vo frè in som,  
El nût kourra pa tou kostè,  
El va travayî kom in Om  
Pou tou skuré, pou tout rlokté !

El krîy aprè tou sè Nûton,  
Ki von lyi d'né in pti koû d' mangn.  
I n' fra pu yoûr din vo mézon :  
Vo l' sintirè bî a vo rangn.

I n' fô nî dîr dou mô dèl Nût ;  
Sè 'n saki ki no fé dou bî :  
El vî d'lé nou a s'n abîtût  
In dalan su l' pwint dè sè pî !

### III.

## Toûr dè paspas.

Ya dè kafouyâch ô tâblô ;  
El Nût arîf, èl prin dè l'yô,  
Avû 's lavèt èl dèsfas tou :  
Vla 'l tâblô fin bia t' taninkoù.

Vo-z-avè dè-z-infan rouyan  
Ki brétt' ou ki s' kougntè tou l' tan.  
El Nût avû 's gran martinè,  
In deû minut lè-z-a rlopè !

Vo feûm, par djoû bèrdèl toudi :  
El Nût arîf dèvin vo li  
Eyè toudoù, toudoù, toudoù,  
In mè in ôt a kostè d' vou !

Par djoû, vo-z-î poktè leû tièt  
A tou lè kêrô dè fèrnièt ;  
El Nût arîf, rsak vo deû-z-î :  
Vo vyè klér pa dvan kom padri.

El djoû avû tou sè-z-arnok,  
A mi dè fèrlop a vo lok.  
El Nût, kè sè 'n marchant dè vloûr,  
Vo-z-in don'ra dè neûf daboûr.

'l djoû vo-z-avoû mi in prijon  
Intrè kat tart è deû ganbon ;  
Vla 'l Nût k' arîf : lè-z-uch ouvriy,  
Vo-z-inkourè abîy, abîy !



#### IV.

### Djoû èyè Nût.

Pou avoû dè-z-èfan, lè-z-om è lè koumér  
Dwattè dalé inchèn, on vo l'a toudi di.  
Sè sa k'èl blan gran Djoû a frékantè 'l bèl Nût  
Eyè ki s'on mariè pou avoû dè-z-èfan...

Sè lè Nûton, sè vou,

Sè mi, sè nou tèrtou.

Mè 's minnâch la, kom tou lè-z-ôt,

I n' va bî souvin k'a mitan I

Kè volè ? In koû sè Djoû,

In koû sè Nût

Ki vûttè yèt mét din l' mézon I

Pindan l' mitan d' l'anéy, Djoû è toudi dèwoûr,  
I keûr toudi banôl : ès feûm n'è nî kontin...

Sa kouminch invî mars.

In jun 's feûm n'èl vwa pu,

Fok deû twâ-z-eûr pou 's rinbrasî.

Djoû è toudi dèvin lè kan :

I bout din l' tèr ou din lè bo

Avû lè bièt, sè vré-z-amis.

Sa lyi plé bî, il è binés I

I n' pins pu fok k'a sou ki fé I

I n' rint pu fok kan il è skran :

Kan il è skran, il è rindu,

Il è rindu a s' pètît Nût I

El è binés ètou d' lè rvîr :  
 I lyi chèn mwin bia k' d'abitût :  
 'S vizâch è tirè, pu si klér  
     Tou brouzè.  
     Kan minm, èl sè mè  
 Tou kont dè li in bon moumin.  
 'L gran Djoû, èl pètit Nût 's sinttè si bi  
     Si bi inchèn...  
     S' sroû 'l pu souvin  
 K'il intèrrin'tè yun din l'ôt...  
 Lè vla là, bi a deû, leu-n-ân m tou kont leû-n-ân m,  
     I sron eûreû, eûreû !  
     Eûreû duskô matin...  
 I n'ya fok kè pal Nût kè lè-z-om son kontin.



## Pèrdè vo deû-z-î...

Kan in Walon vû dir ki n' pû mô d' fé 'n sakè  
I s'astanp dèvan vou, in rsakan 's tièt padrî :

« Vo n' m'è nî rigidè »,

Disti.

'l sî ki parlèroû mô dèl Bèl Nût dèvan mi,  
Dju lyi diroû tou sinp : « Ebî, askoutè, 'm fi

Vo n' l'è nî rigidè ! »

Vo n' l'è nî rigidè, vo n' sè nî kom èl è l  
's vizâch è t' tîsi dou kèl pia d'in pti èfan

Ou 'l sièn d'in fwan l

Rigidè bî, èno, on vwa k'èl djû tou l' tan  
Kom in gamin, a fé dèl poûsiér, tou frotan

Sè deû pî su 'l kèmin l

Ou bî kom in granpé ki fum ô kwin dè s' feû  
E ki d'in fé yeùn dè brûlèn... : sa djû toudi

's fummiér, rigidè l

Mè on diroû k'èl Nût mèl dèvin sè poûsiér  
Dè tou ptitè payèt, dè payèt dè lummiér

K'èl Djoû avou la lyî l

San lè léchi rasîr, rî fok kè pou s' plézi...

El vo lè fê volé ! El vo lé fé dansé,

Eyè tou, tou dvî gri l

E si vo-z-in dalè, — n'uchè nî peû d' dalé, —  
L'afrontéy, èl rûra su vo do, pou li djwé,

In sa dè s' grîz farèn.

Sa fé k' vo n' srè pu rî : vo srè kom in rvènan ;  
Vo srè mèlè a tou, vo n' frè pu fok kè yun

Avû ski è, avû ski è l

Sè si bon ! Vo virè : vo-z-astè kom din l'yô ;  
Dè l'yô ki n' sroû nî klér, mè sè ko bî pu dou  
Eyè ko bî pu bia !

El Djoû li, i fé mô, minm i vo-z-aveûgèl  
Tivozè ! Mè 'l Nût ? Ouvrè bî vo-z-î, ragidèl,  
Vo virè k'èl è bèl !

Sè paskè tout è gri, è k'èl gri sa vo rpoûs !  
N'uchè nî peû, ragidè bî pa dzou leû oûs  
Vo kèstin ki s'èrpoûst.

Lè sèl doûla, k'èl Djoû a tan fé klikoté  
El nè vo diron rî si vo lè rinversè  
Lè vla la : ragidè !

Eyè doûla, in pasan d'lé l'èstûf ? Vèyè ?  
Ya in murwâr pindan : ragidè bî m' n-infan :  
Vèyè 'n sakè d' vivan ?

Sroû potèt bî in rflè dè djîn ki s'on mirè :  
En miyèt dè leû souf, èn miyèt dè leû-n-ân  
Trinn doûla pindan l' Nût !

Dalè toudi, dalè, dalè : vo virè bî, lè-z-uch,  
El sè rtirtè dvan vou pou vo léchi pasé :  
Pasè d'aboûr, n'uchè nî peû !

Lè mùr, yeûs, lè gros meûp, 'n sarin'tè nî klinkî,  
Mè pou nî lè kochî è ki n' vièntè nî s' plangn  
Pèrdè vo deû-z-î a vo mangn.

Pèrdè lè a vo mangn, èyè vo virè, m' fi  
Pal Nût si bî k' par Djoû.  
Pèrdè lè a vo mangn, èyè vo virè, Pér  
K'èl Nût sè 'n bèl Koumér !



VI.

Vo-z-avè di “ nonfé ”.

Vo-z-avè di : « Nonfé  
Sa n'è nî vré ».  
El nût ki mtrou dè rflè ?  
El nût ki froû vir klér  
Sans lummiér !  
Sè dè-z-asblouwèt !  
Mè potèt, —  
Dju l' voûroû bî, — sè rintrè din vo tièt.

Mè di rimè,  
Lè-z-avè askoutè  
Kom dè-z-argèdèn  
In sondjan a vo fèrdèn ?

Vo-z-astè parèy  
A lè muzisyin,  
Vo-z-avè d' l'orèy  
E vo n' sarî nî rtèni in kouplè  
Ni minm in r'frin ?  
Alon, alon, kantè !  
Kantè avû mi !  
Eyè, ragidè  
Lè stwal ô stwalî !

Vo dmore doûsi  
Din in gé payi  
Ki s'in va lôvô  
Din tou l' Enô  
Dèspû 'l Louviér sk'a Valinchèn  
Yusk'on vi si bî inchèn  
Tou l' lon d' l'En  
Eyè d' l'Eskô  
Din 'l gran Enô !

Vo kantè,  
Vo chuflè  
Dè biskouwit è dè fridjan  
In travayan.  
Sa fé k' d'é asprouvè pour vou  
D' kanté ètou  
D'é volu vo-z-inrôlé  
D'é volu djwé  
D' l'armonika dèlé vo n'uch  
Si pô kè s' fuch  
D'é volu vo plér  
In parlan koumér !

Mè si vo stè los, sa n' vo-z-a nî plé !  
Vo n' vo lyè nî fé  
Pa lè djiroleû..  
N'astè nî eûreû  
San tou lè babiòl  
Dè bèlè parol ?



## VII.

### Klér dè Bèl.

Vo n'è nî volu kwâr nèrî  
K'èl nût sè 'n bèl koumér,  
Vo vouîrî bî m' fé tér ?  
Lèyèm mè vo dîr kè sè din no tièt  
K'èl mè dè luminér  
Pu bia k' lè-z-èstwal !  
E sa kant ô doksal !  
E sa vo fé dè klínyèt  
Kom pou invité  
A intré  
Din leû sâkrè roûch bourdèl !  
A l sè lamp-la, èl son si bèl,  
Si kanay tou sè gars la,  
Avû leû fran-z-î  
Eyè leû kronpè djès,  
Ki vo féttè tan dou plézi !

San konté, k' tékfwa, 'l nwâr Nût  
Vî d'lé vou avû 'n saki  
K'è branmin pu djoliy k' li...  
S'è s' seûr, azâr, a vîr sè-z-î !  
Mè yeùn è breùn è l'ôt è blont.  
Vo l' ragidè a vo bon sin,  
Kan èl dèskin  
Ou bî k'èl mont,  
Pou tourpiné dlé vou.  
Vo d'astè bleû,  
Vo d'astè so,  
Vo kéri bî a g'niou  
Din sè filè, mè 'l va tro rèt  
E vo l' vèyè kandjî tou l' tan  
Es bia vizâch è sè twalèt,  
Pou plér, azâr, a sè galan !

Vo stè djalou,  
'm pèti pièro ?  
Vo stè djalou,  
Walon, 'm gran so ?  
Way, los, dju vo kounwa,  
Vo dirî bî avû, èno ?  
Vo dirî bî avû,  
Mè vo-z-avè peû d' kër ô pus..  
Sè pou sa  
K' vo dmore la !



VIII.

**Dju vo-z-é di.**

Dju vo-z-é di  
K'èl nût s'i 'n bèl brunèt  
Ki s'asplouyou sur vou  
Tou sè pu fôûr,  
In vo fzan pat dè vloûr.  
El brouy vo tièt  
A fors dè sondjî ?  
Mè 'l sé bi k' vo fèt voltî  
Dè sonch.  
Sè kom si vo partirî  
Oûr du trô  
Yuskè 'l gars dè vîy vo-z-a infrumè,  
Yuskè 'l blan gran Djoû vo-z-a rwè.  
Dè sonch ?  
En sakè ki n'è nî,  
Vo n'èl savè k' tro bi,  
E pourtant ki vo plé.  
Ki vo plé môgrè vo mô d' tièt...  
Way ! vo l' sintè 'n myèt  
Inskôféy  
Kom vo mangn pa vo-z-osti l...  
Dè sonch  
Ki vo fèttè kriyi  
Kom si vo-z-ari peû  
D' l'orâch ki sklèf èl sièl in deû,  
Dè sonch  
Ki vo fèttè rîr tou wô  
Kom si vo vîrî lôvô  
'n bièt s'inkouri  
K'arou peû d' vou.  
Sa fé k'èl Nût, li, ki sé bi  
K' vo fèt voltî  
Tou sè sonch la,  
Sa fé k'èl Nût vo prin pô bra,  
E vo kondwî ô sinéma !

**M'èl vo-z-aport...**

M'èl vo-z-aport din 's gran kaba  
 Kom si sèroû Sin Nikola  
 En mas d'afèr k'èl vo don'ra  
     Pou vo-z-amûzé  
     Kan i fra monvé.  
 Pèrdè lè tou d' swit : sè dè lif !  
     Ouvrè lè,  
     Lijè :  
     I fra si bon vif  
     Kan vo feùm trikotra  
 Doulà d'lé 'l tâp, kè tout alintoûr  
 Vo p'ti-z-èfan asploûyron foûr  
 Su leû krèyon pou fé leû dwâr.  
     E kan il aron fé,  
     Vo leû lîrè tou wô  
     Lè bèlè-z-istwâr dèl Enô...  
 Sè bi k' din l' tan n'yavoû k' lè rwa  
 Lè rinn, lè duk è lè prinsès  
     K'on lyeû lizoû leû mès  
     E tou lè djès dè leû poupa ?  
 Insi vla l' Nût ki fé dè prins  
     Dè vo-z-èfan  
 Si vo lijè tou wô vou mînm...  
 Eyè vo feùm sra kom èn rinn,  
 S'èl vo-z-askout in trikotan.



## Kan Djoû è Nût...

Din no payi,  
 Kan Nût è Djoû son bi rasi,  
 E nî pu lon  
 Yun k' l'ôt, din leû mézon,  
 Ké bia minnâch !  
 Sa n'arîf k'in koû, sè damâch,  
 K'in koû par an.  
 Mè sè si bon, kè leû-z-infan  
 S'in rapèltè tou l' tan !

Sa arîf ô mwa d' Jun ;  
 L'yèrp è dèvnû si wôt,  
 K'i n'ya pu k' lè fôkeû ki pôttè rintré d'din !  
 A katr' eûr ô matin,  
 Djoû mè tou sè-z-ouvri  
 In rout yun pa yun.  
 Ragidè leû gran koû d' fôk :  
 I n' da nî yun ki fé brôt,  
 I vo-z-aflachtè lè plumia  
 Ey'i vo fèttè dè moncha  
 Si lon, si lon èyè si bia,  
 K'on diroû dè vâk tout vèrt  
 Ki s'in von s' pièrt  
 O diâl lôvô dju n' sé nî yu  
 K'on n' lè vwa pu.

'n milèt pu târ, in plin solèy,  
 Djoû va fé vni tou sè koumér  
 Avû leû mouchwâr su leû tièt  
 — Leû mouchwâr dè kotonèt, —  
 Ki fra leû vizâch pu frèch  
 K'lè sî dè p'titè nounèt.  
 Avû leu rastia,  
 Youp la la !  
 Avû leû ptit fourk,  
 Youp youyoup,  
 El on bî râttou dèspardu  
 Eyè 'l solèy k'on bèni, —  
 K'on bèni dju, —  
 Va tout flani,  
 Tou flani.

I va la dmore konbî d' jou ?  
 On va lè rtourné konbî d' kou ?  
 Pou ki sèkis in dmoren blan  
 Pou ki krakis in l' kafouyan ?  
 I sintira si bon d' daboûr,  
 Kè lè djonnom è lè koumér,  
 In tourpinan la alintoûr  
 Dè leû muya, kéron ô rviér,  
 Ou bî s' rûron pou leû plési  
 Kom din in li.

Lè bièt ragittè fé l'ouvrâch  
 In pinsan a leû fourâch !  
 Sè bî k' lè bièt, sa pins ètou ?  
 El pinstè bî seûr kè sè nou  
 Nou, lè brâvè-z-ouvri d' Djoû  
 Ki lè chèrftè kom dè monseû  
 In tan-z-è eûr  
 Pou fé leû boneûr !

Tan k'on fèn,  
 In spardan lè-z-ondèn,  
 Lè gardin k' leû tèr sèki  
 Poûstè môgrè tou pti-z-a-pti,



— Avû lè kriyô on d'a yeùn, —  
 Mè i son si binès,  
 Si binés d'avoû bî kô,  
 K'i n' sonchtè minm pu a l'yô ;  
 E ki vo don'tè pa skourséy  
 En mas dè fleur : rôs è meûrè.  
 Vo kourè  
 Pou lè koyî,  
 Mè lè li  
 S'astanptè tou droû dvan vou  
 « Pèrdè nou »,  
 Disti,  
 « Sa fé k' vo frè sinti bon  
 Tou vo mézon ».

Djoû, li, vèyan sa, ri toudi.  
 Il è sézi  
 D' tou sk'on a fé pouisé par si  
 Din no payî.  
 I va toudi I  
 Mè pou nî yèt tro skran, ô nût,  
 I s' kouch in nanvé su 'l gazon,  
 I fé in nikè, san fason,  
 's tièt a l'omp, ès kaskèt su s' vizâch,  
 Lè vla la stindu su l' tèr  
 Kom in èfan ki dormiroû  
 Su l'èskoû  
 Dè s' mouman.

I doûr, kom si s'î 'l Nût  
 K'î vnû  
 Su sè kôchèt, pou lyi frumé sè-z-î I  
 I doûr kom in blo.  
 Kî bon rpô I  
 Kan i s'èrliéf, i sin tou l' bi  
 K'èl tèr l'ya fé.  
 I rmèrsîy 'l bon Dieù in li minm,  
 I pins a sè fré :  
 Lè kèrbèni

Ki n' doûrtè nî, yeûs, pa dzou tèr l

Lè kèrbènî

I travaytè kom dè tchi :

Sè nî pèrmi.

Mè li, doûsi,

I ragît lè tèr avû leû déréy,

Tout doréy,

A kostè dè tèri...

Lè tèri, sè nî bia :

Sè nwâr è sa sin mé.

Poukè sk'on lè-z-a lyî fé ?

Pou muchî lè bèlè kampagn

K'on vwa lôvô pasé leû nè

Intrè lè sal koron yusk'on va s'infrumé

Après s' djournéy ?

Après k'on a rlônè din lè nwârè poûsiér,

Après k'on a sintu

Din l' tapâch dè kêr avû leû grosè kinn

Ki klikottè d'din lè trô,

Kan on arèt lè kvô ;

Din lè non dè dieû dè minneû ;

Din lè koû d'èskoup dè kèrkeû,

Lè martia ki rinbustè, lè pi mikanik

Ki dèspinttè vo mangn,

Ou vo kouptè vo rangn.

I pins a tou sè fré..

Mè il a du bon sin,

Il è kontin

Paskè l' kèrbon sè du solèy pou 'l rinskôfé.

Il a dja vu dè payèt d'oûr

Din dè grosè gayèt d'aboûr,

Sa fé k' pour li, sè 'n sakè d' gran

E d' pu briyan

K' dou diaman l

Pindan k' dè poufè sklâf

Travayt' ô fon, doûsi pa dzeûr,

â l k' sa yi chèn bon, l' kaleûr l

I s'èrmè a l'ouvrâch.



Il è voyan,  
I travayra tan ki sra skran,  
Duska l' breùn...  
I s'inrira d' lé 's feùm  
« Aprè stèllâl, kè lyi di, m'n-om  
On dormira bî fran som ».  
I vwa si voltî 'l Nût  
Ki kéra  
T'taninkoû din sè bra !

## Kan l' Nût mètra...

Kan 'l Nût mètra sè lonkè rôp,  
 Invî Oktôp,  
 E dmorra lômin avû nou,  
 Pou no-z-aflouyî  
 El no-z-invoûy voltî  
 Yeûn dè sè vijèn :  
 Sè l' pètit Breûn.

No tatlon in nanvé avû 'l Breûn  
 Su l'èskayè d' l'uch  
 Avû 'l vijèn ou bî 'l vizin,  
 S'ki n' fé nî bon a l' Sin Martin ?  
 Pindan 's tan la, 'l Nût è pu bèl  
 Avû tou sè falbala  
 K'èl mètra in iviér  
 Pou no plér :  
 Dè braslè, dè pindan d'orèy,  
 Kom dè morma d' solèy,  
 K'èl a pri din lè stwal ;  
 Ragidè,  
 Su s' do, su sè spal,  
 Ragidè :  
 Ya dè diaman pa tou kostè.



## XII.

### I n'fô nî dîr dou mô dè bièt...

I n'fô nî dîr dou mô dè bièt  
Ki vûtt'

Al marôt pal nût  
Kom lè ka, lè kakornu, lè katsori :  
— Sè tou lè minm : pusdi  
K' pal Nût lè ka son gri. —  
I glîchtè tou bèlmin din l' nwâr  
Kom dè ptîtè barkèt dè fwâr  
K'in infan tir avû 'n fichèl  
Su l'yô d'èn kuvèl.  
I vûttè djwé  
Pou s'amuzé,  
Sè nî pou vo fé inbété !

Insi lè katsori fèttè dè zizonzès  
In volan d' krès ;  
El voûrin'tè vo rifté,  
Mè sè pou djwé  
O ka mûchî,  
Kourè aprè, vo l' virè bî !  
Atrapè-z-in yeùn a vo mangn :  
Vo sintirè k'leû plî keûr ba,  
— El son a plangn, —  
Kom l'èstoumak d'in pouf èfan  
K'a tro koureû  
Ou k'a yeû peû  
E ki soumak su l'èskoû dè s' mouman.  
Sè doû, sè doû  
Kom dou ku d' ka  
Ou kom èn bon', bon' sakè d' kra  
K'on mindjroû  
In rlèkan sè doû.

# **Ka èyè sori.**

'l ka d' no mézon, san-z-arnok,  
 O kulo dou feû,  
 Bî eûreû  
 Din 's manok,  
 A dormi t' tûlon dou djoû.  
 Il a tékfwa djwè avû nou,  
 Poukè s' ki n' pouroû nî, si vût  
 En bèkéy ô nût,  
 Poukè s' ki n' pouroû nî djwé avû lè sori,  
 Ki vwa voltî,  
 Djwé a s'apwayî ?

Sè l' Nût èm fi  
 Kè lè sori  
 Vwattè voltî  
 Avû leû pti-z-î.

Avû yeûs i n'ya rî d' pièrdu :  
 Ni farèn, ni lâ, ni pangn, ni papî !  
 I n'ya rî  
 K'èl n'inmizèlron pou pasé leû tan,  
 In kouran !

El vwattè bî tou, minm lè pu pti trô.  
 Es k'avû leû grôy'  
 El sintirin'tè  
 Kan l' nwâr è pu spè ?  
 O way aseûrè !



Sè pou sa : n' fô nî dîr dou mô dè bièt,  
Kom lè sori,  
K'èl Nût léy voltî kouri  
Pa t'tavô li.  
El nè fèttè nî  
Dou tapâch,  
Pask'èl son bî sâch ;  
El nè vûttè nî  
Kan no dormon, no rinvèyi

Mè si no pinson  
E k'èl vièntè san fason  
Din no chanp : fuchè bî seûr  
Kè sè nî pou no maleûr,  
Mè pou no fé sondjî k'èl mont vivan  
E bî pu gran  
K'on l' vwa par djoû in travayan ;  
Pou no fé sondjî a tou lè mistèr  
Ki ya pa dzu tèr.

## XIV.

### Si vo-z-arî...

Si vo-z-arî in pti ouvrâch  
K'vo ratindè 'l Nût pou vou l' fé  
El akourra a vo souwé...  
Sa lyi plé bî, lè pti fouchnâch  
K'on fé avû 's feùm a s' mézon...  
N'ûchè nî peû ;  
Pou k' sa dalis tou seû,  
Vo n'è nî a fé, 'm fi,  
Dè rklamé tou lè sangn  
Dou paradi,  
El vo-z-invoûyra sè garson  
Ou sè Nûton  
Pou vo dné in bon koû d' mangn !



## Apré l' Sin Nikola...

Apré 'l sin Nikola  
 Lè djoû keûrtè si râ, k'on dîroû  
 K'il on froû,  
 Mè l' Nût ; k'è toudi la  
 Pou lè rinskandi,  
 Lè ratrap toudi...  
 O kulo,  
 Bî asto,  
 Vo-z-astî si bî  
 K' vo frumè vo-z-î  
 Pou vo-z-insklumi,  
 E vo vla parti  
 Avû 'l Nût.  
 Mè 'l Nût, li, a branmin mieû  
 Indvinté dè djeû ;  
 El s'in va duska 'l vijèn  
 Pou k'on vièn a skrèn  
 El mè dè kart din vo mangn...  
 Vo djûrî duskô leûnmangn !

## XVI.

### Din l' tan...

Din l' tan l' Nût alumoû  
Pour vou  
A parti dèl Toussangn  
Dè kandèy a l' sèmintiér  
Eyè dè buch din vo fèyér.  
On avou dè kinkè,  
Ou dè krachè  
Din lè mézon :  
S'i dè poufè lumion.  
Mè 's tan la è lon...  
Tou mètnan,  
Lè savan  
On si bì fé, k'a vo plafon  
El Nût alum dè pti solèy,  
Eyè 'l s'amûz tout à l' bèbèy  
A tourné lè bouton,  
— S'ê chwèt ! —  
Dè vo lamp san-z-alumèt  
El si kounwa :  
El nè fé k' sa,  
Din 's gran chatô dou sièl !  
El tourn lè bouton, nî tro fèl,  
Minm lè sî d'èn bwat a muzik  
K'è la mi su vo drès.  
Sa fé k' si ya 'n fiès,  
A Pari ou a Brusèl  
Vla 'l Nût ki s'infèl  
Pou vo fé kanté,  
Pou vo fé dansé,  
Si bì k'avû li,  
Sè toudi dukas par si !



## Avû lè leû...

Vo dit k'èl Nût, èl vî tékfwà  
 In fzan 'n mèchant vwa,  
 Avû dè leû,  
 Ou dè mourdreû,  
 Pou no fé peû.  
 Sè yeûs, èm fi ki s'inkourron  
 Kan i vo vîron !  
 Sè yeûs, èm fi, way yeûs tèrtou  
 Ki on peû d' vou.  
 Poukè sk'in voleûr ès much  
 Padrî l'uch ?  
 Alzin ardimin  
 Kom in vré kin !

Lè kin, din l' tan s'astou dè djin  
 Ki savin'tè s' bat,  
 Yun kont dè kat.  
 On n' pal pu fok, ôdjèrdû,  
 K' dè kin du Rû.  
 Mè i d'a yeû, èy' i d'a ko,  
 Dè-z-ôt din l'Enô !

Ebî ! Kom in vré kin  
 Ki n'a nî peû,  
 Nî peû dè leû, nî dè mourdreû,  
 Alzin ardimin,  
 Kriyè tou vo pu fôûr :  
 Vo-z-intindrè dmandé ô skoûr  
 Paskè sè lè leû  
 Eyè lè mourdreû,  
 Fuchè-z-in seûr, ki aron peû !

Sè pou sa ki vùttè 's muchi  
Padri 'l ku dèl Nùt k'è 'n bon' fiy !  
Mè n'uchè nî peû,  
'l sièn ki vo vwa vòlti  
Vo dèsfindra bì,  
N'uchè nî peû,  
Kont dè leû èyè dè mourdreû !



## El Nût véra alumé.

El Nût véra alumé  
 In kinkè  
 Din vo pinséy,  
 Si vo n' mètè nî d' lokè  
 O posti.  
 El vo di  
 K'vo n'è ni a fé  
 D' bî frumé  
 Vo batant :  
 I fé nwâr, kom ô siné !  
 Ragidè  
 Su l'arjintè  
 D'in gran murwâr :  
 I fé bon nwâr,  
 Vo vîrè,  
 Kè s'ê bia, dè stwal filant !

Sè pal Nût ki fô sondjî,  
 Paskè lè djin,  
 Duskô matin  
 Vo léchron bî voltî  
 Trankîy.  
 Minm kè lè ka èyè lè sori  
 S' mèt' a kouri  
 Su leû pat dè vloûr :  
 Sè pou n' nî lè-z-intint d'aboûr !

Sè pal nûl ki fô lyî volé  
Tou vo pinséy  
Kom dè péyon, dè katsori,  
Ki on mi  
Dè boulo d' wat a leû pèna !  
Pinsè tou ba  
A tou lè lumrot dou stwalî,  
Avû leû fran-z-î  
S'èl vo fèttè dè klinyèt,  
Ragidè lè pal fèrnièt.



## Klér dè Bèl su l'Néch !

E dja bi sintu 'm fi  
 Kè 'l Nût sè 'n bon' koumèr ?  
 Esk'èl vo-z-a dja fé dè djès  
 Kom dè karès,  
 Su vo fron, su vo-z-î, vo mangn è vo machèl ?  
 El pas sè doû  
 Sur vou k'on diroû,  
 Pa in bia klér dè Bèl,  
 Kan l' néch a mi in kapuchon  
 Tou blan su lè mézon  
 Tout rakinkyé,  
 K'on n' vwa pu k'èl débou d' leû nè,  
 K' sè leû kminéy.  
 Ebî ! rigidè !  
 Lvè-vou, 'm fi, in djoû, pal nût ;  
 Rigidè bi,  
 Vo sintirè 'n sakè glichî  
 Pa d' din vo kou.  
 Sè doû, sè doû !  
 Vo sintirè 'n sakè d' si tinr,  
 Si tinr, si tinr,  
 Kè vo keûr  
 E kom atirè d' lé 'n maseûr,  
 En bon' maseûr...  
 El Bèl vo sak dèvin sè bra ;  
 Vo roubliyè d' dormi,  
 Vo roubliyè d' sondjî,  
 Vo l' rigidè... vo l' rigidè toudi,  
 Kom èn djonn fîy k'on vwa voltî.

Lè chfeû dèl Bèl son pu lûjan,  
 I son dèvnu blon,  
 Apôprè blan,  
 St'a pour du bon !  
 On diroû k'èl Nût, pou vo-z-apwayi,  
 A stè ô kwafeûr,  
 — Sè 'l solèy aseûrè, —  
 Pou kandji leû kouleûr...  
 El Bèl, on diroû 'n feùm tout nû,  
 Sa fé k' vo sintè din vo kouûr  
 En sakè ki fèrtèy !  
 Sa vo fé dèvni t'taninkouû  
 Fin djaloû,  
 Djaloû dèl Nût.

Vo vouûrî ragidé lômin,  
 Bî lômin.  
 Vo vouûrî ll'avouû  
 Su vo skoû,  
 Rî k'a vou,  
 Rî k'a vou ! Konpèrdè, 'm fi ?  
 Rî k'a vou !

Sa fé k' vo vo mtè a kouri  
 Kom in so,  
 Kom in pièro,  
 Tou voltan, tou tchiptan  
 Tou sôtlan,  
 Avû vo deû-z-î  
 Gran ouvri,  
 Lôvô su 'l Bèl.

Vo deû-z-î 'l swittè skô sièl  
 Eyè 'l Nût vo kouch avû 'l Bèl...  
 Vo vo lyè kèr din in bon li,  
 Vo stè eûreû a kostè d' li,  
 Esk'on n'è nî eûreû din lè bra d'èn feùm ?



## Ayér...

Pou 'm feùm.

Ayér, vo n' m'avè nî konpri :  
Vo dvî travayî, k'avè di,  
Avû 'l Djoû  
Pou fé bouli 'l marmit èyè dné a mindji  
A tèrtou.

Vo n' m'avè nî konpri ?  
Vo n' mè vyè pu voltî ?  
Vo n' vènè pu d' lé mi :  
Sè 'l blan gran Djoû  
Ki vo prin tou l' tan,  
Safé k' mi, d' sù djalou !

Alè ! rvènè d' lé mi 'n miyèt  
Trikoté doula a l' fèrnièt.  
Sè bon, savè, kè d' vo sintis  
La, bi d' lé mi  
Pindan k' dju skri,  
Vo stè 'l pètit lumrot ki brûl dèvin l'églîz !  
Esk'on n'è nî eûreû  
Insi a deû ?

Eyè pal nût môgrè k'vo bèrdèlis  
 Tékwà in kou  
 Kan d' dèskindrou,  
 « — Vo vla ko din lè nuwéy,  
 Vo tièt inskôféy ! » —  
 Dju n' sù nî tris,  
 Dju ri, ô kontrér,  
 Eyè bî souvin, kan d' vo-z-é inpéchi  
 D' fé 'n bon' Nût kom vo vouûrî,  
 Eno ? Kè sè bon k' dju m' rakrochis  
 A vo kwich,  
 Kom si s'î dè grosè rasèn  
 Ki von pèrfon din l' tèr.  
 Din l' tèr ? Sè kom in mistèr  
 Pusdi k'èl nût, li, èl m'intrinn  
 O stwalî dè pinséy,  
 Mè k'a vo rinbrasî dju sin monté dèl séf  
 Dè rasèn duska mè léf.  
 Sa fé k' pal Nût, — riyè 'n bèkéy, —  
 In rdèskindan dou sièl,  
 Dju vo sin kom dou mièl !



## Sè pal nût...

Sè pal nût, kan vo-z-astè skran  
 D'avwâr tro fé « an »  
 In rlayan  
 A toûr dè bra  
 Dè gran kou d' flaya,  
 Kè 'l bint a l' tèr va kouminchi !  
 Vo savè bi,  
 Din 'l nwâr payi dè kèrbèni,  
 Ki fô bouvlé, rbouchi lè trô,  
 Aprèsté 'l tay', sougni lè kvô,  
 Pou kan 'l bint ô kèrbon  
 Véra ô fon.

'l bint a l' tèr, k'è d' din no kouâr,  
 Sè lè Nûton ki travaytè fôûr :  
 I rmètt' a plas  
 Tou lè bidon,  
 Tou lè-z-osti.  
 I rlâftè par la, i rèskurtè par si  
 Din tou vo mézon.  
 Vo san, vo keûr è vo stoumak  
 Pour yeûs, i n'ya ni krik ni krak,  
 Tou dwa krèchi :  
 Vo-z-onk, vo chfeû è vo-z-ocha.  
 Sè dè fin-z-ouvrî ;  
 I rkaptè minm, kan i fô,  
 En piès ô sa, si ya in trô.  
 I vûttè minm mèt dè kostè  
 Pou kan vo srè vî, aseûrè,  
 Dè liâr, kè sè 'l grès dè vo pia.  
 Sa fé k' vo srè pu bia  
 L' leûnmangn ô matin pou vo lvé  
 E vo-z-in dalé,  
 In ruminan tou vo pinséy  
 Kom in bon è brâf ouvrî  
 Ki travay voltî.

## Môgrè lè rat èyè lè leû...

Môgrè lè rat èyè lè leû  
 Lè-z-asazin è lè mourdreû,  
 Môgrè lè djin ki von volé  
 Lè ka ki keûrtè marôdé,  
 Môgrè lè bièt ki sinttè mé :  
 Lè punés, lè markot èyè lè singlè,  
 I n' fô nî dîr dou mô dèl Nût,  
 Sè 'n saki ki no fé dou bî l

Sè no keûr li k'èl vwa voltî.

Sè 'n fiy, vèyè, ki vî d' si lon  
 Ki vî d' si lon è d' ko pu lon,  
 K'èl a branmin d'istwâr din l' tièt  
 Pask'èl a roûlè avant d'yèt  
 Doûsi d'lé nou, tou kont dè nou,  
 Kom èn bon' fiy, dèsu no g'niou.

El no prin tou lè djoû pal mangn  
 E no-z-inminn pa dè kavangn  
 O fon d' nou minm : sè 'n djiroleûz,  
 No ll'askouton,  
 No l' ragidon,  
 El èst eûreûz !  
 Pou nou, k' s'ê bon l



## Vèlla avû vou bî pèrfon...

Vèlla avû vou bî pèrfon...  
 Kom pou dalé ké du kèrbon ;  
 Vo touchè tèr su vo n'ân  
 Su lè tèr 'dè vo mam.  
 In raplè bî ? I fzoû si doû,  
 Si bon kan 'l vo noûrichoû.  
 Vo n' dèvi nî klinkî,  
 Mè vo vîvî,  
 Vo sintî ;  
 Vo stî kom in pti mwan'  
 Ki n' pinsroû fok k'a sint Antwan'.  
 In rapèlè bî, èno ? d' vo mouman,  
 Kan 'l Nût in pal ?  
 Paskè s'î 'l tan,  
 K'èl vo-z-a dnè tou sk'èl avoû.  
 Si 'l tan  
 K' vo-z-astî, fôt-i kwâr  
 Si eûreû,  
 Si eûreû,  
 K' vo ll'avî si a bèl, kè vo l'ègrètè ko  
 Eno gran so ?  
 Vo vouîrî ralé doûla ?  
 « Alon, alon,  
 Fré Walon,  
 Vo sarè bî mieû pu târ...  
 Pu târ... »  
 Eyè 'l Nût rakont dè-z-istwâr  
 Sk'on vîra pu târ,  
 Pu târ...  
 Mè vou, ki a sondjî a s' mouman,  
 Vo brèyè kom in infan.

## Nût èrvî ko.

Nût èrvî ko, èl vo konsol,  
 Avû 'n bon' parol.  
 El vo don', pou vo rapéjî  
 Dè bonè pikant a chuchî.  
 Dalon 'n miyèt pu lon, 'm fi,  
     K'èl vo di.  
 El vo fé pasé din vo châr :  
 Sa n'è nî dûr, sa n'è nî tinr,  
 Sè 'n sakè d' drol kè vo sintè :  
 Vo n' savè pu yusko-z-astè !  
 Vo glichè tékfwa su dè piér,  
 Mè 'l Nût vo rsak pour vou nî kér,  
 El vo rakont tou sou k'èl sé  
 E k'èl a apri a l'èskol.  
     Sa vo chèn drol  
 El vo di minm k'avû tou sa,  
 Avû vo châr è vo-z-ocha,  
 Vo pourî porté su vo spal,  
 El mont t'intiér èyè lè stwal !



## L'Kèmin è lon.

In vo rakontan dè-z-istwâr,  
— El in troûf din tou sè tirwâr —  
El vo di tékfwâ d' ragidé par in wô.  
El vo mous lôvô  
Lè pèl dou stwali.  
— Sè la, aseûrè, k'on l'ya dnè sè-z-î.  
El vû vo-z-in dné pou k' vo fuch kontin.  
« S'èst a mi, k'èl di, pèrdè l'ardimin,  
S'èst a mè parin. »  
Eyè 'l vo-z-in mè din vo mangn,  
Vo djûrè avû skô leûdmangn.

## Sou k'èl Nût...

Sou k'èl Nût vo-z-a dnè : sè trézor,  
 Lè-z-avè mi din vo koffor ?  
 Vo n'in volè ni ? El vo minnra alyeû  
     Eyè vo srè eûreû.  
 El rint in d'din d' vou ;  
 On fra 'l vôi duskô d' bou.

Vo vla din dè trô,  
 Din dè grot avû dè l'yô.  
 Avè dja vu lè grot dè Han ?  
 Sou k'èl vo mous è bî pu gran !  
 Eyè tou sa è d'din vo kouûr ?  
 Vo vo rsakè 'n miyèt du boûr  
 Kan vo vèyè 'l djeû dè sèt sin,  
     Sèt inosin,  
 Ki s' tronpt' ètou in vo tronpan,  
 Kom dè roûleû avû dè monvé fran.

Adon 'l Nût djûra avû vou  
     El krîy « koukoû »,  
     Eyè ko in kouû  
 El vo-z-infil lè pèl dè sè-z-istwâr  
     — S' ki fô lè kwâr ? —  
 El pal dè sè parin dè d' lon,  
 K'èl rinkont tékfwa in kouran,  
     Kom èl lè fé tou l' tan.  
 Vo riyè kom in pti so  
     A tou sè mo,  
 Sè kom si vo sèrî ô sirk,  
 Ou k' vo vîrî 'n lantern majik.



## Kè s' fuch in janviè !...

Kè s' fuch in janviè,  
 Kè s' fuch in désinp,  
 El nè vî jamé tro timp,  
 Ey' èl n'in di jamé asè,  
 El Nût.

Paskè, vèyè, sè 'n si bèl fîy  
 K'a stè a skrèn din tan d' famîy  
 Su tèr, din l' Bèl, èyè lè stwal  
 Din lè-z-èstwal è ko pu lon...  
 Kom èl pèti navîr din lè vyèyè kanson,  
 Ou bi 'l Chapèron roûch, èyè 'l gran Barbèbleû  
 K'on rakont a lè-z-èfan  
 Pou leû fé avou peû.

El Nût in rakont tan,  
 Pou lè pti èyè lè gran,  
 K' vo n'astè jamé skran :  
 Sè nî dè babûs, sè-z-istwâr san parèy,  
 Pusk'èl vivoû avan 'l solèy !

# Insi l' Nût.

Insi 'l Nût vo-z-a apri  
 Tou sou ki ya d'din vou,  
 Tou sou ki yaroû minm ô d' bou  
     D' tou  
     El vo-z-aprin toudi,  
     Toudi,  
     S' ki vi din l' tèr,  
 S' ki vi din l'yô ou bi din l'ér,  
 Minm din 'l Bèl èyè 'l solèy,  
 Minm din lè stwal, sè tou parèy,  
     O sin diâl è ko pu lon,  
 Duskô bon Dieû, si d'a yun ô sièl.

Sè la k' vo mouman a di ki dmoroû ;  
     K'il a 'n grant barp dabôûr  
     Ko pu bèl  
 E ko pu blank kèl sièn sin Nikola.  
     Mè k'il è ko branmin pu bia  
     Branmin pu foûr  
     Eyè branmin pu djus ètou,  
     Puski vwa tou !



Vo sè bi, èno, k' sin Nikola  
Roubliy' téktwa  
Lè pti-z-èfan dè poufè djin.  
Mè li, lôvô tè, li l' vi bon Dieù  
Ki mark tou din in gran kalpin,  
I n' roubliy jamé pèrson'  
Nî pu lè djin, k' lè bièt ou lè kriyô  
Tou s' k'èst in ba,  
Tou s' k'èst in wô,  
Tou s' k'on vwa doûsi ou doûla :  
Lè rich, lè pouf, lè sèk, lè kra,  
Lè pu malin kom lè pu so,  
Pour li  
D' vo l' di,  
Sè tou twal parèy a m' sôro !

## Sa fé k' si l'Nût.

Sa fé k' si 'l Nût èn véroû nî  
 Tou lè djoû d' vo vîy  
 K'èl bon Dieù vo don' ;  
 S'èl nè véroû nî tout a l' bon'  
 Rintran skô fon,  
 — Lè gro i son, —  
 Din vo mézon,  
 Vo n' sârî  
 Rî,  
 Mè rî du tou ;  
 Vo dmorri la kom in kayô,  
 San pouvwâr dîr ni û ni ô.

El Nût, èm fi, sè 'n bèl koumér !  
 El in sé pu lon,  
 Din 's pèti doû,  
 Branmin pu lon k' vou  
 Din tou vo koûr.  
 Askoutèl daboûr,  
 Konpèrdèl,  
 Mtè tou sk'èl di bî a plas din vo tièt,  
 Vo srè eûreû  
 Dè n' pu vo sinti tou seû  
 Eyèt potèt,  
 K'avû 'l tan,  
 Vo fré diron k' vo stè savan,



# D' é ko parti...

Pou 'm feùm.

D' é ko parti  
 Pal nût,  
 Avû 'm krèyon su du papî,  
 O sinperfout — sè vou ki l' di  
 Ôûr dè no li.  
 Tékwfa dju dmeûr la si lômin,  
 Dju trinn su l' kèmin  
 Ki mont duska 'l Bèl aseûrè,  
 Kè vo vo dmandè :  
 « Mè kèski fé ? I va vîr lè fiy  
 Eyè i m' roublîy ».

Sroû 'n bèl afér  
 D'dalé vîr in ôt koumér !  
 Sè bî k' kan on a frékantè  
 Avû 'l nwâr Nût,  
 Sè bî k'aprè,  
 Doûla d'lé vou,  
 Dèvin vo bra, intrè vo g'niou,  
 I fé pu kê, i fé pu doû !  
 Sè bî k' vo ganp son tou parèy  
 Insi pal Nût  
 A dou solèy ?

Lèyèm m'indalé  
 Dju r'vére,  
 Eyè adon,  
 No-z-infonsron,  
 Si pèrfon  
 Din 'l tèr dè no keûr,  
 Kè l'arzî  
 N' sè dèstakra jamé d' no pî.





*El Kanson d'no viva.*





## El pu bèl kanson dou mont.

El pu bèl kanson dou mont  
 Sè l' sièn dè no vwa.  
 — Sa dèskin èyè sa mont, —  
 Sè l' kanson dè son  
 K' no kanton mieù k' dè mouchon,  
 Nou lè djin ki sèttè skrîr  
 E ki sèttè lîr,  
 Osi bì k' chuflé  
 Ou parlé !

El pu bèl kanson dou mont  
 — Sa dèskin èyè sa mont, —  
 Sè l' pètit kanson dè son,  
 Sè l' pètit, pètit kanson  
 Ki s'inkeûr  
 Oûr dè no goyî ou bì oûr dè no keûr,  
 Pou kachî après 'n saki  
 Ki no-z-intin,  
 Ki no konprin  
 E no mè din s' paradi.

El pu bèl kanson dou mont  
 — L' sièn ki dèskin ou bì ki mont, —  
 Sè l' vyèy kanson  
 Dè son  
 K' no dzon.  
 Avû leû bia djeù  
 Ki no fé parèy ô bon Dieù !

## Vo-z-avè rinvèyî lè mo...

Pou 'l mètsin Nopère.

Vo-z-avè rinvèyî lè mo  
 Ki dormin't ô kulo din m' tièt.  
 Il on djwè din m' li, lè marmo,  
 A rwé in l'ér tou lè kouvèrt.

I s'on batu a koû d' kousin  
 In tapan foûr dèsu leû tièt ;  
 Il on fé plouk su l' traversin,  
 Il on ragidè pa l' fèrnièt.

I s'on muchî pa dzou lè dra  
 Pou rîr dèl lummiér k'î kandjéy :  
 Yavoû 'n sakè... mè k' sa î bia !  
 Ki leû fzoû peû 'n pètit bèkéy !

Il on dmore la bî lômin,  
 Pou l' plézi d'yèt yun kont dè l'ôt !  
 Vo-z-avè vnu vîr, vou, Mètsin ,  
 « Bî, kèskè vo fèt la, vou-z-ôt ? »

Kè vo-z-avè di in rian.  
 Lè mo s'on bî râst astanpè :  
 I vo-z-on di, — sè dè-z-èfan, —  
 « Nou-z-ôt, nou-z-ôt, nò-z-avon djwè l »



### III.

## Apèrdè...

El Nût m'a di k'èl introû  
Tou lè djoû  
Din vo mézon.  
Pa yu adon ?  
Bî ! Pa lè port èyè pa lè fèrnièt  
Dè vo tièt.  
L' pu souvin pa vo bouch, aseûrè, —  
Kè sè minm adon k' vo ronfyè, —  
El glich insi su 'n sakè, —  
On diroû in trotwâr roulan.  
Sè kom dou vifarjan  
K'èl rinkont tou lè djoû in vnan  
D'èn pètit èstwal, ou din 'n planèt  
Yusk'èl s'arèt  
Pou rsakî in nanvé s' n alèn,  
Mè sè nî lè pèn,  
El a mieù vni d' lé vou.

Ey' èl m'a di linsi  
Ki fouroû fé djwé sa, — èl parloû d'èl lank, —  
Kom lè fîy kan d'astoû gamtia,  
Fzîn'tè sôtlé dè p'ti-z-ocha.  
El djwin't a bèk,  
El lè rtournin'tè, èl lè touchin'tè  
Dèsu leû g'niou,  
Dèsu 'l koupèt  
Dè leû tièt.  
« A mè fo, a mè do » : on touchoû,  
On touchoû tou,  
On riyôû,  
On tatloû.  
« A mè fo, a mè do » : s'î in bia djeù d'èfan !

Ebî ! mètnan  
K'èl Nût m'a di in fzan dè métimus :  
Dit a vo Fré Walon ki fèstè djwé leû lank ;  
Dit yeû k' tou kominch par la !  
Dit yeû k' lè djîn son dèvnu dè-z-om,  
Pask'il on seû skrîr  
Eyè lîr.  
Dit yeû ! Dit yeû k' tou kominch pa leû lank,  
Kom i n' vittè k' pa l'r !  
Sè l'ér k'èl voloû dîr ?

D'aboûr, Fré Walon,  
Apèrdèl,  
Ruminèl  
Dîn vo tièt  
Kom lè bièt  
Ki rmachtè leû foûrâch,  
In tapan, — ragidè bî, —  
Leû bia-z-î  
Si lon, si lon,  
K'on diroû  
K'èl lîzt ô pu pèrfon  
D' leû n'ânrm, èyè dèl nôl, èyè dou mont ètou.



#### IV.

### A l' lins !

Kan no-z-astin' pèti gamtia  
Ki djwin't ô yâr ou bî ô ma,  
On aploû lins èl lign dou pa  
Yusk'on s' mètoû pou rkominchî !

On partoû dè dla, on raloû doûla  
Kan on vo dmandoû pour vou ko djwé 'n pâr.  
Mè on survèyoû tou lè-z-agonâr,  
Si vo-z-astî dok, là vo l' moustrî dja !

I m' chèn a vîr kè tou mètnan,  
Lè djîn voûrin'tè djwé 'n bèl pâr  
In fzan 'n grant bint bî a l'avnan,  
In n' lèyan pu rî a l'azâr !

Mi dju vû bî, paskè lè mo  
Lè mo k'on no di in fransè  
I son si drol è si uzè,  
K' no n' konpèrdon pu no parlè.

Si vo dit « Komunis », on intindra « bandi ».  
Si on di : « Ortnouvô », sa vû dîr « Ortansyin ».  
Kan l'inmi è batu, sè ki vo fou 'n rakléy !  
Bî râd dalé in wô s'ara kér a l' valéy !

Askoutè lè mètsin, lè jûch, lè-z-avoka,  
Lijè din lè gazèt, lè lif èy' insi d' swit,  
On a mi in fô nè, on no pal maskarât,  
I fô kriyî a rmèt... sa n' va pu, sè djeù la !

A l' lins ! A l' lins ! on va tou rkominchî !  
A l' lins ! A l' lins ! on va tou dèsfasé !  
A l' lins ! A l' lins ! abîy ! abîy !  
Ralon' a l' lins mon Dieù don si vou plé !

V.

**El plank.**

Vo-z-avè stè sézi  
Fré Djozèf,  
Paskè lè mo k' d'avoû apri  
Kan no djwin' inchèn a l'èskol,  
On asplouyi si foûr, si foûr,  
Su l'uch d'èm sètièm sin, —  
Sè l' sî ki sin,  
Tout a l' koupèt  
Dè no foslèt, —  
K'il l'on fé volé, k'il on tou skouftè  
Eyè tou ramounè !

Vo dit : « Sè drol ».  
Sè drol !  
Pourtan vo montè bî skô gèrnî d' vo pinséy  
Pou ranchné din lè soûr ;  
Vo savè bî k'on rtwèf tékfwa in wô d'èn plank,  
Pa dzou deû doû d' pouésiér,  
In lif, in djeû, èn sèrinèt  
Kè vo tnè din vo mangn, lômin,  
A vo bon sin,  
Pou sondjî a s' ki ya d'din.  
Va savè bî k' tou sa fé rmouvé tou vo san !  
A ! vo djonn tan !  
Eyè vo vla parti ô trèvi dè pousiér  
Duska 'l sèmintiér...  
Yusk'on ll'a mi tro timp, 'l sièn k'è vu si voltî !  
Sa fé k' dju vi doûsi, avû 'n pètit skrivèt  
Rapèlè no djonn tan, k'on djwoû inchèn al bal,  
Din l' koûr d'in èskol, vo savè bî ayu.



In raplè bî, adon, k'on voloû inpéchi  
Tou lè skoli  
D' parlé walon ?  
Eyè k'on donoû 'n plank a tni  
Pindan lè djeû ô si k'i pri ?

On povoû pasé 'l plank  
A yun k'on intindô  
Parlé patwa ètou,  
Sa fé k'on gignoû...  
Mè kan on avoû fé mank  
A sou k' dè mèchan mét avin'tè dèsfindu :  
« Tènè, vla 'l plank »,  
Eyè vo dmorî tou pèneû !

El plank, s'i bzan,  
Kan vo koumarât, in djwan  
Riyin'tè d' vou !  
S'i 'l minm k'on sèroû pri pa s' kou !

Ebî ! Fré Djozèf, pour mi 'l plank, sè 'l fransè  
K'il l'a mi  
Din lè mangn dè Walon.  
Mè tou mètнан d'é fé volé 'l plank padrî m' ku,  
Dju l'é rwè, dju n' sé nî yu  
Pa dzeûr dou mùr...  
San print mè mzûr !...  
Eyè mè mangn tou mètнан,  
Mè mangn èyè m' tièt  
Son dèvnû si lidjèrt,  
K'on diroû t'taninkoû,  
K' dju m'é rtrouvè kan d'daloû 'm pièrt.  
Eyè sè tou parèy  
K'on rsakroû  
Dè boulo d' wat oûr dè mè deû-z-orèy' !

Pou Mamzèl Denise Labouchère,  
Ki a rkopyî mè di rimè.

VI.

**Vo poupa m' a di.**

Vo poupa m' a di,  
K' a fors d' avoû skri  
Tou mè di,  
Vo-z-arî pri gou  
O walon ètou !

Sa n' mè sézi nî !  
En djonn fiy d' no payi  
Dwa sinti  
S' ki ya d' bon,  
Eyè d' foûr  
D' aboûr,  
D' in l' walon !

Mè pourtan, mamzèl Dènîs,  
Tékfwà kan on l' ravîs,  
No walon è 'n miyèt rût,  
Il arok kom dè kayô,  
Ou bî sa brotch èyè sa vût  
Kom dou siro  
K' on in mè pa d' tavô  
S' bouch èyè 's nè, sk' a sè-z-orèy.

Way, no parlè sè tou parèy  
A dou kra ou a dou spè !  
Sè 'n sakè  
K' lè djolîy ptitè Mamzèl  
Ki ll' on tro a bèl,  
N' minchtè nî voltî  
San 's fé priyî ;  
El on mieû lè pti patè...  
Lè karot al krèm dou fransè...



D'é poutan pinsè,  
Puskè vo-z-avî pri gou  
O walon ètou,  
K' si dè djonnè fiy ki son bèl kom vou  
Volin'tè parlé in walon kom nou,  
Kom nou lè-z-om ki son pu dûr, —  
K' leû mo sè kom dè bal ô mur, —  
S'èl volin'tè parlé kom nou,  
In pasan pa leû léf lè mo srin'tè pu doû !

## VII.

### Dju vouroû...

Pou 'l Mètsin Nopère.

Dju vouroû bi, savè Mètsin,  
K' vo n' dèmorri pu si lômin  
San vni 'm vîr.  
D'é tan èyè tan a vo dir !

Insi, komin skè dju vouroû  
A pour dou bon,  
Aprint a lîr èyè a skrîr  
A lè Walon,  
Sè din lè lif kè dju l' mètroû.

Vèyè, mi, dju sù kom dèl l'yô  
Ki vût doûla, tè, oûr dè tèr,  
E ki s'inkeûr tou l' lon dou kmin.  
'St-in pti richo  
Pou lè gamin a pî dèskô !

Vou, Fré Mètsin,  
Vo-z-astè yun dè pti gamin  
Ki vièntè pou fé dè-z-astanch,  
Pou ragidé sk'on vwa din l'yô.

Alè !  
Vnè ragidé ! Vnè,  
Frè Mètsin !  
Eyè vo m' dirè  
Kan dju kafouy,  
Si vo vyè dou sièl ou bi dè bèrdouy !



## Charlè Kin.

On rakont kè Charlè Kin, —  
 K' sî in Flamin, —  
 Kin dè Flant èyè d' l'Enô,  
 Parloû Walon bî kom i fô.  
 Eskè s'î nî in Kin dou Rû,  
 K'on di ko ôdjèrdû,  
 In Prins dè Kroyi  
 Ki ll'avoû alvè par si ?  
 Kan il a dèvnu rwa d'Espagn  
 Eyè minm inpèrèûr d'Almagn,  
 Il a apri  
 A parlé sèt lank k'on di.  
 Sèt... pou s'èsplikî avû tou sè djîn :  
 In latin, in grèk èyè in italyin,  
 In èspaniol, in alman èyè in flamin,  
 In walon :  
 Sa fé bî sèt tou ron.  
 « Avû lè koumér, pou yèt doû  
 Dju pal italyin, li, ki dzoû.  
 A lè savan,  
 I fô parlé latin tou l' tan.  
 O bon Dieù, in èspaniol ;  
 A mè kvô, sè drol,  
 Dju pal alman ou bî flamin.  
 Mè pou bî 'm fé konprint dè djîn  
 Eyè lyeû fé intint rézon,  
 I n'ya fok k'èl fransè ou, ko bî mieù, 'l walon ».

## Walon - Pikâr.

Lè djin d' Namûr è d'a kostè,  
 I s' dîztè « Namurwè ».  
 Invî Nivèl, Braban walon,  
 On vo di k' sè dè Brabanson.  
 A Liéch, Vizè èyè Esneû,  
 Sè dè « Lidjeû ».  
 A kè mank k'on n'a fok trouvè  
 « Hennuyers »  
 Pou loupé lè djin d' l'Enô,  
 Tou ll'on d' la En èyè d' l'Eskô.

Sè nî walon, sè dou fransè  
 Télmin fayè,  
 K'on n' sé nî ko sou ki fô dîr :  
 « Annwiyè »  
 ou « ènwiye » ?  
 Non mè san rîr,  
 Esk'on n' dîroû nî 'n kaskèt  
 Dè chanpèt  
 Dèsu 'l tièt d'in kurè ?  
 « Annwiyè »,  
 « Enwiye » ?  
 On n' no-z-a nî dnè in non  
 Bî walon ?  
 On n'aroû nî seû azâr ?  
 On aroû dvu dîr : Pikâr !



## Lè mo.

Lè mo, lè mo k' no dzon,  
 Dju n' saroû nî mieû lè rmèt,  
     Fré Walon,  
     K'a dè pidjon.  
 Dè pidjon... vo d'avè potèt,  
     Vo lè vyè si voltî  
 Su 'l bél ou d'din vo pidjonî !

Kè s' fus dè pikayî,  
 Dè gro bleû ou dè roucha,  
 Vo lè trouvè si bia, si bia,  
 Kan vo lè pèrdè a vo mangn,  
 Apôprè kom dè pti sangn,  
     Ou dè pti Jèzu  
 K'on a peû d'asplouyî dsu.

Vo lè pèrdè, leû pat intrè vo dou,  
     In nanvé,  
     San lè sèré  
 Eyè vo sintè k' sè dou  
 Leû pleûm pa dzou !

Vo sintè bat leû pti keûr ;  
 Vo buvrî bî leû kouleûr  
 Avû vo léf, pa pti kou  
 Kom dè bètch dèsu leû kou,  
     Yusk'on diroû  
     K'on a mi  
     Dou vèrni.

Vo rigidè leû jônè-z-î,  
Tou fran,  
Tou ron,  
Ki vwattè lon,  
Pusk'i rkounwattè vo mézon  
In rvènan  
D'Orlèyan ;  
Minm dè Daks : sa sè l' pu foûr,  
Kan 'l gro Bleû va ô konkoûr !

Vo-z-ouvèrè leû pèna,  
— Rigidè sa l —  
Kom on stin sè kart din 's djeù,  
Pou vîr mieù  
Lè triyonf k'on a !

Vo mo, k' sè dè pidjon,  
Lè-z-avè bî rinli  
Pou avou dè pri,  
Kan vo frè kouri ?

Vo mo, k' sè dè pidjon,  
Lè-z-avè bî akouplè  
Si vo-z-alvè ?  
I n' no fô pu d' bastardè !

Pidjonis èm fi, vouûrî avou l'ér  
K'ârî dè kampinér ?  
Nonfé, èno ? Lè mo walon  
I pûtè dalé lon,  
Minm ô konkoûr dè Rom : sè lè mèyeû pidjon !



## Lè Lèt.

Lè lèt, kè no skrìvon avû  
 Kom « a, è, i, o èyè û »,  
 Vo n' savè pu 'm fi, k' sè dè-z-imâch  
 Ki vo paltè  
 Kom lè sièn dè vo kayè ?

Vo kwayè k' sè dè gribouyâch  
 Ki n'on nu sin, dè kafouyâch  
 Kom tou lè sî  
 K'on fé d'in preûmî  
 K'on è skolî.

Nonfé ! Nonfé : askoutè bî :  
 L' sî k'a indvintè 's djeù la,  
 I ya lômin d' sa,  
 Dju kwa k' sî in Latin,  
 S'i bî seûr in malin !

Tou lè sin' dèl kroûzèt,  
 Kom on dzoû din l' tan pou loumé lè lèt,  
 I vùttè dîr èn sakè d' si drol,  
 K'on nè l' sé minm pu din lè skol.  
 On ll'a roubliyî  
 Puskè sa vî  
 D'in mont kè lè djin  
 N'avin'tè nî ko leû sèt sin !

Insi paskè dè-z-om on trouvè dè-z-imâch  
Pou yavni a parlé  
D'aprè dè sin' k'on skri,  
Na-z-avon kandjî no ramâch  
Eyè no kri,  
No sézismin,  
No plézi,  
On lè-z-a di  
A tou lè-z-ôtè djin  
Ki on konpri.

San lè-z-imâch k'on fé pou skrîr  
Sondjè k' lè-z-om arin'tè dmore  
Ottan dîr  
Kom lè bièt, — sè bî lè tchî, —  
Lè poufè bièt ki konprinttè si bî  
Sou k' leû mét di,  
Mè pou no parlé i n'on k' leû-z-î  
Eyè nou-z-ôt, nou-z-ôt lè djin  
Avû no bouch èyè no-z-orèy,  
Parèy ô bon Dieù,  
Avû lè lèt, on a fé dè mèrvèy !



## XII.

### El preùmî sin'.

El preùmî sin' dè l'èkritur, Fré Walon,  
Sè l' ron,  
Sè l' lign k'on n' vwa nî l' kouminchin ni l' dèbou ;  
Sè nou.

K' no ston bî louyî din in sa :  
No pia.

Sèparè k'on dïroû  
D' tou s' ki vi a kostè d' nou !  
Sè nou

Kom dè bia pun k'on a koyî, —  
Adan ou Ef, dju n'èl sé nî, —  
Sè nou

Kom dè pun tou ron  
K'èl vin a fé kër d'in pumî,  
El gro pumî dou mont  
Avû dè rasèn si pèfont  
Eyè dè brank si lonk, si lonk  
K'èl touchtè tèr è sièl  
Kom èl toûr dè Babèl.

El ron, vèyè,  
Sè 'n sakè d' si bî achvè,  
Sè 'n sakè d' si pur,  
K'on ll'a chwazi din l'èkritur  
Pou rprézinté in Om ki pal  
In Om ki di  
Tou ski sin in li minm è ki li din lè stwal !

XIII.

**Lè vwa sonant.**

Kan vo stî pti,  
Pou vo-z-amuzé vo poupa a mi  
En bèl fwèy d'yèrp intrè sè pouûs.  
Il a souflè s'n alèn la dsu,  
Vo-z-avè intindu  
'n pètit troupèt.  
Sa n' koustoû nî kër :  
En milèt d'ér !

Ebi ! din no goyi no-z-avon dè langèt  
Kom èl fwèy d'yèrp,  
In souflan mèyeû, —  
S'èst in bia djeû, —  
In doû pu ba, in doû pu wô,  
En bèkéy pu foûr, èn bèkéy pu doû.  
Dèspû a duska ô,  
On mont k'on diroû,  
A l' koupèt d'in toû,  
Ou kom si vo kantrî « do ré mi fa sol la si dô »  
« A â è é i î o ô ! »  
Aprè, sa va kom in rouloû  
Ki dèskindroû :  
« Dô si la sol fa mi ré dô »  
« O ô ou ôu eu êu u û ! »

In raplè bî  
Kan vo kantî :  
Do ré mi fa sol la si ut  
Tou lè flamin sè dè flayut ?  
Fèt èl minm avû lè lèt  
Sa n'è nî si bièt,  
Vo n' dirè dou mô d' pèrson'.  
Vo-z-intindrè bî kom sa son'  
Lè vwayèl dè no walon  
Rimtchitchim dèsu 'm violon !



# El preùmî son.

El preùmî son k'on fé vûdî  
 Oûr dè s' goyî,  
 Sè 'n pètit vwa :  
 Sè a.  
 Vo stè sézi, 'm fi,  
 Vo dit : « a ! »  
 Ragidè bî 's lèt la,  
 Kom on l' vwa  
 Din lè lif : « a ».  
 On diroû 'n saki ki s'in va  
 Avû 's pans padrî, 's pans d'a.

Mè l'istwâr dou a,  
 Sè branmin pu bia.  
 Vo n' volè nî 'm kwâr  
 Kè tou lè lèt on leû-n-istwâr ?

Pèrdè 'l ron kè yun d' sè pwin  
 S'inkeûr radmin ;  
 In pwin,  
 Sè vo souf, sè vo-n-èspri ;  
 Sè l'ér kè vo fèt vûdî,  
 Par in wô, oûr dè vo goyî ;  
 Lè vla parti  
 Kom èn pètit sori :  
 « a » !

In skrîvan 's sin' la a tèr ou su in mur,  
 Kèsk'on vo di din l'ècritur ?  
 On vo di :  
 Poûsè 'l preùmî kri ;  
 Eyè vo vwa  
 Fé « a ».

L' pètît keûy k'on skri pa dzou  
S'èst in louyin,  
Pusdi k' lè lèt sè kom lè djin :  
Tou seû  
On è maleûreû.  
Sa fé k' lèt ou djin,  
On s'agrôy a sè vijin l



## XV.

### In Kolè d' sonant.

#### A

A, sè l' bondjoû k'on di, tou kontin a 'n saki  
Sè l' pètit vwa k'on fé kan on a stè sézi  
'n milèt... ; s'èst in mouchon k' vo-z-avî din vo mangn  
E ki s'invol doûla su in moncha d'èstrangn !

A, sin bon kom dou lé k'on bwa vûdan dou pi,  
Dou bon kra lé krinmeû avan ki fus bouli ;  
Sè l' gou dèvin vo bouch kan vo mindjè dou grangn  
Kè vo-z-avè spiyî, su l' kèmin, din vo mangn.

A, sè l' flér dou bon pangn ki vût tou kô du foû  
Kan vo mouman a fé, pour vou, in pti panion ;  
Sè l' goû d'èn frikaséy k'on fé a vo mézon

E ki mont a vo nè, ouvran l'uch taninkoû,  
A, s'èst in son ki vût, mè k'on sin ko din s' koûr,  
Sè vo-z-î ki s'ouvritt' in avan dormi foûr.

## XVI.

### Æ

Poukè s' kè lè Fransè  
On skri « è » ou bî « ai » ;  
Pou moustré 'l deûzièm vwa  
K'on fé aprè a ?  
Sè 'n drol d'istwâr :  
El fé pinsé a Jul Sézar,  
El gran mourdreû k'a vnu par si  
Avû tan è tan d' sôdâr,  
Kè lè Romin son dèvnu mét dè no payi.

In latin on l' loûmoû : « Cæsar »,  
« Julius Kèzâr »,  
K' sè minm dè dla k'on a di « Kzâr »  
Ou bî « Kèzèr »  
Kom lè-z-Alman d'avan l'ôt gèr.

Pou lè Latin « æ » s'astou « è »,  
K'on skrivoû in mtan a kostè  
Dèl preûmiér lèt « a »  
In pti baston nî pu wô k' sa :  
Al.

Sa voloû dir : pousè ,  
Pousè,  
L'é'r kè vo frè vûdî  
N' milèt pu lon, d' vo goyi ;  
Pousè kom pou a, 'n milèt pu lon,  
Ragidè :  
Al.

Lè deû dèsin akinnè  
On fé « æ »,  
è l



Mè lè Fransè n'on rî konpri,  
Sa fé k'on a skri  
« ai » ou bî « è ».  
No fôra fé kom yeûs ètou :  
Môgrè Kæzâr è môgrè tou,  
L' deûzièm sonant in walon pikâr,  
Fô kè s' fuch « è » môgrè l'istwâr  
Eyè môgrè Julius Kæzâr !

## XVII.

### E

E, sè kom s'on annyoû din dè boul dè ranpwèl  
San bî savoû s' kè sè ; sè dè roûchè grouzèl  
K'on kôy dèvin s' gardin, in pasan, ô grouzli.  
Sè 'n pikant a l'oranch ki kèy dvin vo goyi !

E, sè l' flér dè kaklinch, dè fréz ou dè fourdrèn  
K'on va kachî ô bo avû 's pètit vijèn  
Ki s' léyroû bî doné in bètch su sè machèl,  
Pou k' vo lyi rinplizis tou s' muzèt, li, mamzèl !

E, sè s' kè l'infan di in moustran avû s' dou,  
Sè 'n milèt dè surprîz ki kakèy vo-n-orèy ;  
Sè 'n pètit pok k'on s' fé a s' tièt ou a s' gènioû.

Es in kri ki dèskin ou ki vût ôur dou keûr ?  
Es dèdja l'alowèt ki mont invî l' solèy ?  
Es èn vwa ki s'in va ou vo keûr ki s'inkeûr ?



## A èyè I.

N'è jamé dmandé  
 Poukè sk'on mè  
 Kom èl ko d'in klokî  
 In pwin su î ?  
 Si vo l' roubliyî,  
 Kèsk'on diroû d' vou  
 Non dè djou ?

Si vo sondjè bi  
 K'in pwin, sè l'ér k'è fé parti  
 Su lè langèt dè vo goyî,  
 Si vo sondjè k'avè di « a » èyè ko « è » avan d' dir « î »,  
 Si vo ragidè : ,  
 « Al »  
 K'è dèvnu « æ » kan on skrîvoû  
 Eyè « è » kan on lijoû ;  
 Si vo ragidè  
 L' pèti baston k'èst a kostè,  
 Vo konpèdrè  
 K' si on a mi in pwin pa dzeûr,  
 S'î pou moustré k' vo n'alèn s'inkeûr !  
 Sè l' twâzièm vwa,  
 Sè vou ki vû dalé pu wô,  
 Toudi pu wô,  
 Pou vo gonflé kom in balon.  
 Sa fé k'èl pwin, lè vla parti :  
 L' djeû dè vwa n'è nî fini !

## XIX.

### I.

« i », vo stè si sézi, kè vo n' savè nî ko  
Si vo dvè rîr ou brér : vo dmore la a sto.  
Mè vo kriyè radmin, mè vo pouèsè in kri :  
Oûr dè s' gayol, il è parti, vo kanari !

« i » 'n léy rî din vo bouch ; pon d' gou dvin vo goyi !  
On diroû, l' pèti los, ki vû spité a-z-î  
Pou infilé sè pèl a lè pway dè pôpiér |  
« i » sè l' pwint d'in èsplink, din vo kwich pa 'n koumér !

« i » ri kom in sinplo ou bré kom in browér ;  
« i », vo stè insblouwi, « î », sè kom in èklér ;  
Sè n' kalot ki fé vîr tékfwà trint-chî kandèy !

Avû « i », st-in tèrél ki int din vo-z-orèy,  
I va ko pu pèrfon k' s'on arachroû in din  
Mè vla 'n sakè d' bî drol : « î » n' fé jamé d' souyin !



## O

« ô » rapèl taninkoû l' gou k' vo-z-avè wardè  
 Dou tan k' vo-z-astî ko din l' koûr dè vo mouman.  
 L' gou d' rint lè-z-ôt kontin ou d'yèt raboulotè ?  
 L' gou d' doné ou d' sakî dou lé spè kom dou san ?

« ô » vo-z-astè maflè ; « ô » vo kourî tro fèl ;  
 « ô » vo vla tou pâchè ; « ô » vo n' vèyè pu klér ;  
 « ô » vo n'astè pu vou : vo stè l' mont tout intiér  
 Plangn kom in û, gro kom èn boul, gran kom èl sièl !

« ô » broûy din vo-z-orèy : abîy d'é 'n tourniyol !  
 Sè vo deû-z-î ouvri kom dè port dè gayol ;  
 Sè l' bon Dieû ki vo sèr sè pu foûr din sè bra

Kom kan vo-z-astî pti, in raplè, vo popa ?  
 « ô » : vo-z-èfan ariftè pou vo bistokî :  
 Sè 'n larm kè vo sintè glichî oûr dè vo-z-î !

## Ou = Oe.

Kan on arîf a l' fièstichûr,  
 Kè s' fus d'in toû ou d'ès goyî,  
 I fô rdèskint ô pî dou mùr  
 Paskè lè son kacht a vûdî !  
 Dè sèt, i dmeûr ko twâ vwayèl,  
 Purè sonant tout ôsi bèl.  
 On lè fé d' l'ôt kostè dou toû.  
 In wô dou palé on di : « ou » ;  
 « Eu » è rwè, li, 'n milèt pu lon ;  
 « U » vî 'l dèrnî a l' porsèsion.

On n' vwa nî foûr klér su l' damâch,  
 Ya dou brouyâr, dè kafouyâch !  
 Vo n' sârî ni dîr ôdjèrdû,  
 Kan, dèl Louviér, dalan ô Rû  
 Vo pasè pa Goûgnér d'aboûr,  
 Si vo dvè dîr : Oudin Gôgnî  
 Ou bî si sè : Oudin Geugnî ;  
 In fransè, vo n'èl savè nî,  
 Mè in walon, vo l' vèyè bî :

« œ » sè « ou ».

Vo pasè pa Goûgnér — tou koûr.



## OU

« Ou », chonkièm vwa,  
 Swî « ô », a deû pa ;  
 Deû pa d' sonant bîntintindu.  
 Sè sa k' d'in preûmî on a vu,

In pti ron  
 Eyè in baston :

Oï

Aprè ô, l' souf va ko pu lon  
 In pa pu lon :

Oï

Vo l' vèyè bî, vo frè bî sa  
 T' tafé kom « a »  
 E lè-z-ôt vwa.

« Oï » è dèvnu « œ », in lè rlouyan  
 Tout in skrîvan.

— Vo riyè ? — Vo dit : « Inosin » ?  
 Vo skrîvè sa a vo bon sin.

« æ » èyè « œ » sè dè djumèl,  
 On pû d'in vîr din lè vwayèl,  
 Pusdi ki d'a bî din lè djin !

## OU

« Ou » : vo vo sintè skran, vo rkèyè taninkoû.

« Ou » : st-in rinwa k'on fé kan on a bû dèl biér.

« Ou » : sa sin 'n miyèt l'ay' ; sè kom in ariérgou  
Dè tou s' k'avè mindjî ou bû d' tro foûr ayér !

« Ou ! » : vo partè sézi ki n'ya pu rî pour vou !  
Sè dou kafè rbouli ki dmoroû din l' kaftiér.  
S'èst in flér dè brin d' ka ou bî dè tourè d' chou.  
Sè sk'on sin ko tékfwà dèvin lè sèmintiér.

« Ou » ? Vo-z-intindè, mè, fô k'on kriyis pu foûr,  
« Ou » ? Vo n' vèyè pu klér, fôra mèt vo lunèt.  
« Ou » ! Vo sintè ki ya pou brér sè-z-î touwoûr !

On avoû stè binés : « ou » sè l' leûnmangn d'èn fièt ;  
« Ou » i plû din vo-z-î, vo-z-è froû vo-z-orèy ;  
« Ou » tout ô fon d' vo keûr ya n' sakè ki skôpèy.



## XXIV.

### E = eu.

El sîjèm vwa sè « e » ;  
S'èst in ron : o  
Avû 'n keûy pa dzou : e  
Insi l' pèti pwin ki rprézint èl son  
Vla ki s'inkeûr doûla  
Par in ba.  
Vo bouch è ko 'n miyèt ouvriy,  
L'ér pas abîy, abîy !  
Vo dit : eù,  
On a skri : e.  
On vo mous bì pa s' sin' la,  
K' vo-z-arivè ô d' bou dou kmin  
(« e » s'è « a » mi a l'invier)  
Sè vou, l' ron ki soufèl dè l'ér.

## Eu.

« Eu » ! vo rnòdè, vo djumisè, vo stè fayè !  
 « Eu » ! s' n'è pu vou ! S'î si bon, non dè djeù !  
 Eyè mètnan : « eu » !, on kwa k'on n'a nî yeû  
 Tou s' kont ô kabarè !... Alzin ô kabarè !

« Eu » ! vo-z-askoutè... vo-z-intindè par si par la  
 Sou k'on n' vû nî intint : dè pâter dè pourcha !  
 « Eu » sè vo-z-î rsakî, vo chfeû ki fèttè mô.  
 Fô pasé su dè steûl in stan a pî dèskô !

« Eu » ! vo vyè tou d' trèvî, kom si vo bèrlondjî ;  
 « Eu » ! vo n'avè pu d' keûr pou dalé travayî ;  
 « Eu » ! vo-z-astè dbôchî : vo vo sintè foutu,

Vo-z-in dalé tou d' krès : vo rkèyè su vo ku !  
 « Eu » ! s'è vo vîy finîy : vo n'è pu k'a mori  
 On va vo mèt a plas : « Eu » ! : sè vo dèrnî kri !



## U

Nonfé ! s'è nî ko tou, poûsè vo léf pu foûr :  
 Vo dirè ko 'n sakè ; vo vo foutrè dè djîn ?  
 Vo frè 'n pètit grimas ? Aprè vo srè kontin.  
 Poûsè ! Vo sintirè k' vo n'astè nî ko moûr !

« U » ! vo rpèdrè dou keûr. « U » vo vo-z-inkourrè  
 Kom in pti roûch kèvô k'on l'yaroû kriyî : yu !  
 « U » ! rigidè d'van vou : vo kwayè k' sè dè brû,  
 Mè poûsè : « U » pu lon, i ya in pavè.

« U » n' vo lèyè nî kër, kontinuwè l' kèmin  
 N'uchè nî peû ! Alzin tou vo pu rèt ! Alzin  
 Rtrouvè vo koumarât ki djûtt a l' bal su l' plas !

« U » ! vo vla in èstè èyè vo chuchè 'n glas !  
 « U » ! vo sintè k' sè froû ! mè sa vo fé dou bî ;  
 « U » ! vo-z-è rpri dè fors : sè pour vou rkouminchi.

## Kouleûr dè vwa.

Lè kat preûmière vwa :  
a, è, i, ô ; ô, i, è a,  
Son t' t'ôsi frank  
K'èl jôn, k'èl roûch èyè l'oranch l

Avû sè kat la sè no keûr ki s' rinvé,  
E ki vwa dou solèy.  
El on l' kouleûr dou feû,  
El sî ki s' kôf, i s' sin eûreû !

El son ko tout kôt,  
Kom nou-z-ôt  
Din no pu pèrfon,  
Tan k' no vivron.

Mè lè twâ-z-ôt : « ou, eu », è « ù »,  
Son kom dè fleûr kan il a plû,  
El son rfwadiy,  
Raboulotéy è raskèrpîy.

Twâ vèrdèlo :  
Lè twâ son ki vièntè aprè ô !



## Lè twâ vèrdach.

« OU » : on port deù : il è violè ;  
 « EU » è vèrdach  
 Kom dè marach,  
 I sinttè l' froû : i son d'lé l'uch,  
 N'on pon d'ècharp, n'on pon d' kapuch  
 Mè kom i vwattè l' bleû dou sièl,  
 I keûrtè fèl.  
 Avû « U », i printtè djà l' kouleûr dè l'ér  
 Pa lè bia djoû  
 Kan l' sièl è klér,  
 Sa fé k' din « û », « ou » èyè « eû »,  
 I ya dou bleû !

Insi lè vwa pa leû kouleûr  
 Palt a no-z-î kom a no keûr  
 Mè 'l nè son vrémin dè mèrvèy  
 K' pou no-z-orèy !

## XXIX.

### V

Avan d' s'in dalé pou du bon  
L'ér djûra ko 'n not dè violon

Su vo léf,

El s'in va :

Sè l' dèrniér vwa...

El dèmeûr in nanvé

Pou s'èrpouzé

Su l'èskayè...

Eyè, rouf, lè vla daléy !

### V

Lè vla spètéy

Kom in mouchon !

Pu jamé, pu jamé

Vo n' lè rvîrè.

El pièro èst involè,

L' toûr è fini, n'ya pu d' kanson

Lè vwa din l'ér

Son kandjéy in luminér !



XXX.

V = U

Eyè l'imâch dou pti mouchon,  
Kom on in vwa dsu lè plafon,  
Vo n' lè rkounichè nî nèrî ?  
Vo ll'apèlrî bî d'in fô non :

« Vé ».

Mè sa nè nî vré !  
On a skri V, on a di U, pindan  
Dè sin è dè sin-z-an.

Eyè mètnan,  
El lèt ki mous èl sètièm vwa  
St-in akouplâch, dju n' vo di k' sa !  
Sè deû-z-î

Ki on lèchî leû pwin padrî,  
I n' d'on nî dandjî.  
S'èst insi k'on a vu  
V k'è dèvenu U.

# Djeu d'no vwa, djeu d'no vîy.

O, sè l' pu bèi vwa.  
Sè pu ron k'in pun èyè vo-z-annyè d'din  
Avû tou vo din.

O, vo montè ô sièl, k'è tou ron ètou  
Vo montè tou droû  
Pou dalé lôvô  
Kér din lè bra stindu du bon Dieù k'èst in wô.

Mè pou yavni, fô fé branmin  
Branmin dou kmin !  
Vo parlî tou ba  
Avû « a » ;  
Vo n'onzi rî dir : vo-z-astî sézi  
Eno, 'm pèti ?

Avû « è », 'n milèt pu foûr,  
Vo-z-avè kriyi d' daboûr  
Aprè 'n saki k'è vnu d' lé vou.

Vo stî binés avû « i »,  
Vo-z-avè koureû pu rèt,  
Pou arivé tout a l' koupèt,  
Sa fé k' pou atrapé « ô »,  
Vo-z-avè yeû kô.

Sè kom si vo grimpyî al pièrk ô savon  
Pour vou dèspint èl ganbon !

E dja vu  
K'on a râst èrdèskindu ?  
Vo ramasè tou,  
Tou l' savon, lè sint ètou  
Avû « ou ».



In ba vo vla tou onteû ;  
Vo dit : « eû... »,  
Kan vo n'avè rî yeû !

Mè vo-z-amis kriyttè : yû

U.

Vo rgrinpyè, vo vla rparti  
A pî dèskô. Pouèsè 'm fi !  
Montè ! Montè !  
Sè l' vîy linsi,  
Fô rkouminchî,  
I fô parti èyè rvèni.  
Partè,  
Rvènè,  
Sè l' djeù dè vwa  
Sè l' djeù dèl vîy,  
El kouminch avû « a »,  
M'èl nè sèron jamé finîy  
Puskè sa tourn toudi, toudi,  
Kom in djeù d' tirlibibi.

## Lè 7 mèrvèy.

Kan vo dalî a skol, vo mét vo-z-a apri  
 Ki yavoû chon vwayèl : poukè s' ki n'a nî di :  
 » I d'a sèt  
 Kom sèt not dè muzik pou djwé din no goyî. »

Kan vo dalî a skol, vo mét vo-z-a apri  
 Kè no-z-avin' chon sin : poukè s' ki n'a nî di :  
 « I d'a sèt  
 Sè kom pou vo chèrvi k'vo-z-arî sèt-z-ouvri. »

Kan vo dalî a skol, potèt k'on vo-z-a di  
 Ki ya sèt djoû dèspû l' dîmins duskô sèmdi :  
 « I d'a sèt  
 Pou fé 'n sèminn, sè vré, mè avè bi konpri ? »

Kan vo dalî a skol, èsk'on n' vo-z-a nî di  
 Ki ya sèt sakrèman ? Potèt k'on a splikî :  
 « I d'a sèt  
 I fô sèt sakrèman pou gannyî l' paradi ! »

Kan vo dalî a skol, potèt kon vo-z-a di  
 K'on a pinsè lômin ki yavoû djus sèt sièl !  
 Poukè sèt ?  
 S'i pou mèl din l' pu wô lè dieû kom din 'n potèl.

I fô sèt an k'on di pou k' fus l'âch dè rézon.  
 Yavoû sèt brank, èno ? ô kandlé d' Salomon ?  
 I fô sèt  
 Aseûrè pou vîr klér a s' k'on di è s' k'on fé !

Kan Newton' a dèsfé l' blank lummiér dou solèy,  
 Il a vu sèt kouleûr kom dèvin l'arkansièl.  
 I fô sèt  
 Aseûrè, minm d'aprè lè savan, pou 'n mèrvèy.



Si d' diroû tou mètнан ki ya sèt konsonant  
Kom i ya sèt vwayèl è ki ya yeû din l' tan  
Lè sèt pu grant mèrvèy dou mont ?  
Vo rîrî potèt ?

Mè vo konpèrdri bì k' no vwa è no parol  
Son pu grant, son pu bèl è son pu mèrvèyeûz  
K' lè sèt mèrvèy inchèn, k'êl siêl è l'arkansiêl,  
Kè lè sèt sakrèman su l' vôi dou paradi,  
Pusdi k'avû lè mo no-z-avon seû pinsé  
Eyè l' Bon Dieù, s'èst in pinsan k' no ll'avon fé.

## Lè 7 vwayèl, lè 7 konson'.

Sèt vwayèl : sèt koû d' tronpèt,

Tronpèt d'èfan, su lè langèt

Dè no gozèt.

Sèt konson' : sèt sour-muwè

Ki n'on pon d' vwa,

Mè ki aspwéftè

Avû leû lank pa leû buja

Dè bì parlé, minm dè kanté.

Lè maleûreû, n' sèttè nî djwé :

Sa n'a pon d'ér, sa n'a pon d' sin,

I paltè kom dè-z-inosin.

Sifé, pourtan, askoutè bì

S' ki vùttè fé

In fzan vûdî

L'ér dè leû bouch tout grant ouvriy.

Lè vwayèl, yeûs, dittè s' k'on sin ;

Lè konsonant tou s' k'on vû fé.

Sinti, pinsé,

Fé.

Kèskè no fzon d'ôt su la tèr

In atindan d' ralé ô sièl,

D'yu s' kè no vnon in pasan pa no mér

Din l' mont dèl l'yô

Avan d' vîf din l' mont dè l'ér ?

Sinti, pinsé,

Fé,

Sè tou no vîy

Ki n' sra jamé, jamé finiý.



## K C Q G.

Vo-z-ouvrè vo bouch è, san fé djwé vo langèt,  
 Vo souflè in bon koû kom pou rwé l'ér a l'uch  
 In vo chèrvan d' vo lank ki s'èrliéf èn miyèt :  
 Vo-z-intindè « Q » ki son' si pô kè s' fuch  
 Kom « K » ou « C » è minm kom « G », ki son parin.  
 « Q » : l'imâch vo mous bì kè l'ér s'in va tou droû!  
 « K » : sè l'ér ki asplouy sè deû mangn k'on diroû  
 Kont èl mùr dou palé avan d' print moûr a din.  
 Si « C » è mieù stanpè, « G » sè l'ér 'n miyèt flô  
 Ki s' sin malât dè keûr avan d' print sè voléy,  
 S'è kom yaroû deû lèt : yeùn solît, l'ôt fayéy !  
 Dè sè kat konson' la, lyon-z-in deû su l' kârô,  
 Sa fé k' sè « K » è « G » k' no viron su l' kèmin  
 El preùmiér : « G » sè 'n fîy, èyè « K » st-in gamin.

# K

« K », on mè ll'a dja di, pok in bon kou lè-z-î  
 D'èn mas dè Walon, on di k' « C » è pu ron ;  
 On l' rinkont in fransé, poukè n'èl pèrdè nî ?  
 Poukè ? I n' fô k'èn lèt pou bi skrîr èl minm son.

« K » è dûr kom dou kinn ki poûs din no payi,  
 Dou kinn pou fé dè meûp ou bati dè mézon ;  
 Dou kinn ki è si bia ki n' no fô nî 'l vèrni  
 E k' dju l' vwa pu voltî k' lè bo ki viènttè d' lon.

« K » son' kom in kou d' poun ki rinbus dèsu l' tâp  
 E ki moustéroû bi kè vo-z-astè kapâp  
 Dè tou rwé pa l' fèrnièt si on stanp su vo pi.

S'èst in ouvri ki rbint pou gannyî 'n bon' djournéy ;  
 S' ki n' chéroû nî a vîr kon intin in kèrtî  
 Ki skèt dè non dè djeu a gran kou d'èskoréy ?



## T D

Pou dir « K » où bî « G » on fé 'n bos avû 's lank  
 A l'intréy dè s' goyî in léchan l' pwint trankîy.  
 O lieù d' lyi dné in koû d'èspal kom pou fé « K »,  
 Si vo lank inkach l'é'r in lyi rwan in koû d' pî,  
 Sè « T » ou « D » k' vo frè vûdi.

Sè tou l' minm parintéy, pusdi k' kan no ston pti,  
 Tou no « K » son dè « T » : lè gran on dou plézi  
 D'intint lè-z-èfan dir « ti von ô tabinè ».

« T » : vo fèt èn gros lank ô mitan,

Vo ratchè in minm tan.

« K » : vo-z-inflè vo lank pou l'asplouyi

A l' port dè vo goyî.

« T » di tou nèt sou ki vû fé,

« D », 'n miyèt onteû, li n'onzrouû nî

Eyè i s' rastî.

Sè pou sa k' bî d'abzok dèsu l' montan dou « T »,

Ragidè 'n flèch si bî tiréy,

K' vo-z-abatrî bî l' ko èyè ko 'n kan' avû !

« D » vla l' kort ki skap... èyè sè 'n flèch pièrdû !

Lè Walon, bon tireû, mètè branmin dè « T »

Din leû parlè.

# L è R

« K » èyè « T », sè dè vré koû d' grizoû  
 Rlèvè kom èn bay èl dèbou d' vo sansû, —  
 Kè sè l' pwint dè vo lank bî kontin kan èl djû ; —  
 Fét glichî l'ér kom d'in kouloû :

Vo-z-intindrè « L »  
 Ki glich kom èn fichèl ;  
 Mè si vo lyè dou djeù a vo lank, ké n'afèr !  
 Vo-z-intindrè n' sakè ki rapèl èl tonèr ;  
 El triyan', èl djougèl,  
 I n'ya nî pu d'arèt  
 K'a l' Barèt :  
 Sè « R ».

Sè « R » ki roûl sè-z-î kom in mèchan chanpèt,  
 Ou bî in koumisér  
 Ki aroû mô bèl ér !  
 Sè « R »  
 Ki a dou nèr  
 Kom nou tèrtou, mè fré Walon :  
 Sè pou sa k' no l' roulon.



## S

Mtè bi vo lank a pla in l'asploûyan 'n miyèt  
 Kont dè vo jinsif, kont dè vo din : 'l plas è bèl ;  
 Fèt glichî l'ér tou droû ô mitan dèl bowèt :  
 Kom èl vapeûr d'in trin, taninkou sa chufèl :

« S ».

Vo chufèlè

Si lômin k' vo vouèrè !

« S »,

Vo frè tér lè djîn,

Ou vo lè rapèlè.

« S » :

Sè 'l rinmouleû d' sizèt

Ou bi l'aracheû d' din

Avû s' touèr dè mourdreû.

« S » :

Es èn souyèt,

Ou bi l' vijèn ki inkach sè pouyèt ?

Souflè,

Rsakè,

Din lè deû sin kom avû 'n rèsèprès

Vo fèt « S » !

Eyè ragidè bi l'imâch kom in krochè,

In bia krochè d' bouchî !

'n vèyè nî

K'in partan

Dou mitan,

Si bi in d'din kom in dèwoûr,

Vo souf djû a chinchin mamouèr !

XXXIX.

## S Z

« Z » mwin fèl, chufèl ètou,  
Mè pu doû,  
'n miyèt pu doû,  
K'on dîroû.

Ragidè lè : yun 'st a l'invier, l'ôt a l'indroû.  
Sè l' minm zizonzès tou lè deû,  
Lè chifloteû !



## CH J

« S » : l'ér vût pa-n-in pli trô ;  
 « Ch » : i ya 'n fint ô tiyô,  
 Sa fé k' l'ér kom èl vapeûr  
 S'inkeûr, s'inkeûr  
 A picho pa tou kostè.

Sà l' minm pou « J », k'è pu fayè.  
 Il aroû bì dandjî, 'l maleûreû  
 K'on fèzis vèni 'l tiyôteû !

Sè deû konsonant la n' son nî foûr katolik,  
 Sa n' vô nî 'n chik,  
 Sè pou sa, aseûrè,  
 K' no n' lè vyon nî voltî, nou-z-ôt, din no parlè.  
 Sè pou sa, k' douïsi  
 Din no payi,  
 No lè fzon chamté  
 Ou bì no l' z-akouplon avû « D » èyè « T ».

**F**

Pou rafwadi so soup, dèstint in alumèt,  
 Pou rinskandi vo doû kan l' bîch fé dè pinchèt,  
 Dè deû boûr dè vo lank fabrikèm in buja  
 Eyè fronchè vo léf : on lè fronch san kordya.

Souflè bî éjèlmin : « f... » on intin pou dir ri  
 Kom si vo-z-in dirî dèsu l' pwint dè vo pî.  
 Vo souflè si doûsmin dvin l' kou d' vo ptit koumér  
 K'èl ri in s'èrsakan, mè s' raproch pou vo plér,

E vo lyi dnè in bètch... Vo souflè, vo souflè :  
 Sè nî t' tafé si bon kan vo-z-astè maflè !  
 Vo fèt bî « f » ètou kan vo n'in povè pu,

« F » 'n n'è nî a fé d' vou, ou 'n n'è nî dandjî d' sal  
 « F » s' n'è fok sa k'aportè, bî, vo d'astè in bia !  
 « F » pour mi, vo kontè tout ôttan k'in fèstu !



V

« V » èst ôsi blâtch kè s' fré « F », roûtch è dûr.  
 « V » no-z-aston dju d' souf ; no ston ô d' bou dèl vôi.  
 Kè volè : lè-z-om rôyt't èyè l' bon Dieù dèsrôy,  
 I fô bi 'n fin a tou, minm ô djeù d' l'èkritûr.  
 I fô rplouyi vo klikotia,  
 Ragidè « V » : sè l'imâch dè deû pèna ;  
 D'in mouchon ki s'invol !  
 « V » sè no parol  
 Ki vût dè léf pou 'n pu rvèni :  
 Tout è fini !

# M N

Ya ko pourtan deû konsonant

Lè deû dèrniér,

Ki vo fèttè brér,

Tandi k'avû lè-z-ô, on kant.

« M » : on a gannyî 'n pâs èyè vo fèt èn kwa ;

Sè l'uch k'on frum a klé èyè k'on fé l' vèrya ;

« M » : vo mètè d' l'èstoup pou mieù rastèni l'ér,

Ou bi s' kè vo mindjè.

Vo léf ouvriy vo lè rklapè :

Klap !

Kom èn trap.

Kom pou mori

Ou vo nôûri.

Kom pou annyî,

Kan vo stî pti,

Din vo mouman.

Eyè mètnan,

Kachè 'l pèti pwin din l'imâch, ô mitan.

Swivèl : i fé in « V »

Mè a pèn involè,

Ragidè

Lè vla skiyî

Pou rintré pa vo goyi.

« M ».



N

« n » fé sondjî

a « m ».

« m » è « n »

On l' minm dègèn,

Mè i n' son nî parin pou sa l

« M » s' fé avû lè léf ;

« N » a in bèk dè liéf,

Sa fé ki pal toudi din s' nè.

Pou l' fé, l'ér s'a trompè d' kostè,

E tivozè

Vo n' srî nî dir

Si vo pouèsè : « n », ou si vo rnifyè l

St-in brinkèzîr

Ki s' mèl dè tou

I parvî minm a s'akouplé

Avû : a, o, i, u èyè ou.

St-in pti kranè

K'a toudi l'ér inkatarè.

# XLV.

n

Mè rigidè  
 L' portré dou kranè !  
 L' dèmitan dou M k' vo dirî ?  
 Dju n'èl sé nî,  
 Mè d'é l'idéy  
 K' sè l' souf ki rvî :  
 Rigidè bi !

n  
 |

I rint pa vo nè,  
 E si vo rsakè  
 Branmin pu foûr,  
 Sk'ô fon d' vo koûr,  
 Vla l' souf ki s'in va  
 Si ba, si ba.

n  
 h

K' vo n' sarî ni l' rastèni  
 D' sinkouri :  
 Lè vla rparti.  
 sè n' nouvèl lèt. — on n' sé nî kè,  
 Vo rsakè vo n'alèn  
 Kom si vo-z-arî branmin dèl pèn ;  
 Sa va ko pu lon  
 K' vo talon,  
 Eyè 's koû la,  
 In vo dmandan « Yuski s'in va »,  
 Nou-z-ôt Walon  
 No riyon,  
 No n' vèyon nî voltî s' kous la  
 E sè pou sa k' din no parlè,  
 No n'avon pon d' « h » aspirè.



## XLVI.

### Avû tou sa...

Konpèrdè bî k'avû tou sa,  
Tou lè lèt k'on a indvintè,  
On a trouvè 'n sakè d' pu bia  
K'èl tèlègraf, k'èl tèlèphon',  
K'èl téhèzèf è l' sinéma,  
K' tou s' k'on intin, tou s' ki rézon'  
Tou s' k'on a fé è tou s' k'on vwa !

L' djoû k'on a seû dir a lè djin,  
Fèt dalé vo n'alèn, vo bouch è s' ki ya d'din  
Kom vo l' vèyè pa mè-z-imâch ;  
L' djoû k'on a seû konprint dè gribouyâch  
Su lè mùr k'on avoû skri ;  
S' djoû la no ratayon ki rchènin't a dè bièt  
On dèvnu dè vré-z-Om, èyè leû tièt  
    Eyè leû fron  
Eyè leû bouch è leû minton,  
    Leû vizâch pu ron  
On si bî, si bî kandjî,  
K'il on portè leû vwa duskin wô dou stwalî.

## On vo-z-a di...

On vo-z-a di : « Parlè fransè  
 E vo dirè pa tou kostè. »  
 Sakrè inosin !  
 E asprouvè, avû l' fransè,  
 D' vo-z-in dalé pa tou kostè ?  
 Vo n' kounichè nî ko lè djin  
 Ki vittè par si !  
 Si vo dali  
 Pou kouminchi  
 Din lè koron  
 Dou payi walon ?

On vo-z-a di : « Parlè fransè  
 Vo srè konpri pa tou lè djin. »  
 Mè si vo vizin  
 Palt in walon  
 Paskè sè dè poûfè djin  
 Avû tro d' djonn din leû mézon,  
 Vo lè-z-arè si bî a din,  
 K' vo dèsfindrè a vo-z-èfan  
 D' dalé djwé pa dvan  
 Eyè d' parlé minm avû yeûs.  
 E si leû vîy è maleûreûs,  
 A vo vizin, in parlan fransè,  
 Eskè vo trouvè  
 Lè parol  
 Ki konsoltè  
 Kom din l' parabol  
 Dou bon Samaritin,  
 Ou din l'istwâr dè Sin Martin ?



On vo-z-a di : « Parlè fransè »,  
 Pou fé l' touër dou mont aseûrè ?  
 Eskè lè mèyeû pidjon  
 N'èrvientè nî toudi volti  
 A leû pidjonî ?  
 Avè dandji  
 D' vo-z-inkouri  
 Pou gannyî vo vîy ?  
 Eskè vo 'n vèyè nî  
 Pa l'-z-ètranjè ki son par si  
 .K'avû dou keûr è dè bon bra  
 On s'in va  
 Ayu s' k'on vû, kan on onz bi  
 Ragidé lè djîn din leû-z-î.

On vo-z-a di : « Parlè fransè,  
 Vo srè mieû alvè ».  
 Alvè pa ki ? Alvè poukè ?  
 Kom i ya dè madam ki alyéftè leû tchi  
 Pou ki n' dalistè nî pichî  
 Din lè mézon, nî dèrindji ?

On vo-z-a di : « Parlè fransè »  
 E vo dvèrè  
 Pu kom i fô !  
 Kom ki ? Kom lè ka  
 K'on a koupè  
 Pou ki dvièntè pu kra  
 Pu bia,  
 E fustè dè bon pti-z-apôt,  
 Ki n'indiron pu a marôt ?

On vo-z-a di : « Parlè fransè »  
 Eyè  
 Bi sâch, vo-z-avè asprouvè,  
 N'avè nî toudi stè  
 Om dè bon' volontè ?  
 Vo-z-avè asprouvè,  
 Ey on vo-z-a strannè


Din l' karkan dè parol  
Kom in fôkol !  
Vo-z-avè asprouvè,  
Mè vo stî pu jènè  
K' si on vo-z-aroû rwè  
A l' gayol  
Paskè vo-z-ari volè  
Ou twè.

Vo-z-avè asprouvè.  
Ari pinsè a pour du bon  
K'èl fransè vô mieû k'èl walon ?  
Alon, alon,  
Vo parlè, mè fré Walon,  
Sè 'n lank pu fèrm è pu solît,  
— El n'a pon d' rît, —  
Sè 'n lank pu djus,  
— Mè 'l n'a pon d' lus —  
St-in ramâch pu klér è pu nèt  
Kè n'inport ké parlè ô mont ;  
Sè rasèn von si lon, si lon din l' vîy dou mont,  
Din lè kayô kom din l' marlèt  
Pa dzou lè Fran, lè Romin è lè Sèlt,  
O trèvi d' tou lè sort dè djîn,  
K'on vi minm par si avan lè Nèrvyin,  
E lè Ménapyin,  
K'on sin ko l' sèf dè preûmiér lèt  
K' no ratayon on indvintè  
Kan l'Om n'astoû nî pu k' lè bièt !



*El djou d'na sèt sin*

---





## A ku tou nu.

Es pou no rasoti k'on rakont  
 K'on vi au mont  
 Din lè chou dou kurè ?  
 Poukè nî dîr, minm a no pti-z-èfan  
 K' no vûdon d' no moutan,  
 Kom in kayô  
 K'èl pich in lyi fzan mô ?  
 On l' vwa ko bi pu voltî,  
 S' moutan, pu târ,  
 Kan on sé bi  
 K'èl no-z-akat branmin pu kër k'avû dè lyâr !

Pindan dè mwa, no-z-avon vi  
 Tou raskèrpi,  
 Raboulotè din l'yô,  
 Din l'yô d'in û, yusk'on avou si kô  
 K'on n' savou nî s' kè s'i : brér,  
 Avan d'avou mi s' nè a l'ér.

On i myeù k' dè légum dè kouch,  
 Bi abritè kont lè djèlèy.  
 On n' devoû nî minm ouvri s' bouch,  
 On vo chèvoû dè bon' lampéy  
 K' vo sinti vni kom dè chiléy  
 Duskô d' bou d' vo pi ki pîtyin'tè  
 Duskô fon d' vo kouîr ki krèchoû  
 E vo parin,  
 Kontin,  
 Dizin'tè :  
 « I rû dja l' ku è don' dè kou. »

E vla k'in djoû, kan l' tan è vnu,  
D' vo mèt in rout a ku tou nu,  
San kriyî gâr ! a mangn !  
Vo-z-inpartè d' vo poûf mouman,  
Ki avoû mô sè rangn,  
E ki î skran  
D' vo-z-avoû portè kom in pakè tro bzan !

Vo poûf mouman  
Kriy tou mètnan,  
Kriy tan k'èl sé a sè vizin,  
K'èl è kontin  
Dè s' souladjî,  
Abîy, abîy !



## Vo vla skèpi.

Vo vla skèpi,  
 Tou sézi.  
 L'ér asplouÿ si foûr, si foûr,  
 Su tou vo pti koûr,  
 K'èl vo fé mô è vo spotchroû  
 Taninkoû.

Vo sè bi k' l'ér  
 Sa parè lidjér.  
 El pèz asè pourtan pou vo skwaté  
 S'èl nè kourroû nî pou rintré  
 Pa lè deû trô d' vo nè,  
 Ki bôyttè  
 Doûla pa dzeûr vo bouch fruméy,  
 Kom si vo léf in'tè koléy.

L'ér rint abîy è vo fé brér l  
 L'ér  
 Kè sè vo n'ânrm d'aboûr,  
 Animra tou vo koûr,  
 E si vo n' brérî nî,  
 L'akoucheûs vo froû kriyî,  
 In vo dnan 'n tap, èm fi, pou vo-z-aprint a vîf l

## El preùmî djoû.

L' sin dou dèwoûr a bî sintu  
 K' vo stî myér nu,  
 Din in mont branmin pu gran  
 K'èl pans tou ront dè vo mouman.

L' sin dou dèwoûr a bî sintu  
 K' vo stî pu mizér k'in yèrnu  
 E k' vo dmorri la aklapè  
 Dèsu l' pavè,  
 Si n' vo diroû nî :  
 Fôra kachî  
 A mindjî.

Eûreûzmin k' pou l' preùmî djoû,  
 Vo mouman ki pins a tou  
 A sî bî rimpli l' bèzas,  
 K'on pas  
 Vint katr'eûr a ruminé  
 Sou k'on va fé  
 San rklamé !



#### IV.

### El preùmî sin.

Vo stî muchî din 'n klok dè Rom,  
Vo n' sintî nî l' pwa d' l'ér la dzou ;  
    Eyè tou mètnan, in plin djoû,  
Vo fôra vîf din l' mont dè-z-om ;  
    Vo fôra vîf din l' mont dè l'ér,  
    Dou solèy è dèl lummiér,  
Din l' mont dè bièt èyè dè djin  
Tou ron, tou ron, ki n'a nu sin ;  
D'in mont si gran, si gran, si gran,  
    K'in vo mtan ô mitan  
    Vo n'in vîrè jamè l' dèbou,  
In mont branmin tro gran pour nou,

    Vo sintè, bzan su vo pia,  
    In si gro pwa,  
Ki ya n' sakè ki s' pas in d'din :  
    Sè l' jwin  
Intrè l' preùmî è l' deûzièm sin,  
    L' sin dou dèwoûr  
    K'è d'din vo pia,  
Dèspû vo doû sk'a vo-z-artya;  
    L' sin k'èst in d'din —  
    Sè no bon sin, —  
    Ki no-z-aprin  
A n' fé k' sou ki è bon pour nou  
    Kom si sèroû  
In anch gadyin.

## O gran moncha.

Lè pti kanâr, lè pti poulè,  
A pèn skèpi, s'inkeûrtè dja;  
Lè pti bèdo, è minm lè vya,  
Twèftè bî tou seû leû tètè.

Mè nou-z-ôt, fi dè Dieù, nou-z-ôt, èfan,  
Kan no mouman  
N' sonch pu k'a s'èpoûzé a fors k'èl è si skran,  
Aprè sè mô, kèskè no dvérin' s'èl no lyôû  
Intrè sè g'niou ?  
E si n'yaroû nî 'n feùm,  
L'akoucheûs ou bî no nèn,  
Pou fachî no boudèn ?

No ston skèpi,  
Mè no n'avon pon d' ni  
Kom lè mouchon,

No ston skèpi,  
M'i no fouroû mori  
Si n'yaroû nî la 'n saki  
In akrocheû pou no-z-afté  
A l' kèn san fin  
Ki klik ô gran moncha pa d'tavô lè tèrin,  
Bèrlîk-bèrlîk, lè stwal èyè lè djin.



## Twâzièm è Katyèm Sin.

Kèskè vo nè a raskoyî ?  
 Vo-z-avè dja l'ér dè kachî.  
 Eski yaroû 'n pètit sakè  
 Ki trinnroû la d'lé vou ?  
 Vo-z-î son ko frumè  
 Vo n' vîrî nî sou ki yaroû,  
 Mè pourtan vo sintè, vo sintè  
     Avû vo pti nè !

E kan dou lé va asplouyî  
 Din vo bouch ouvriy pou chuchî,  
 Sè 'n miyèt d'in ôt, arî d' vou  
 Ki rint ô fon tou doû, tou doû,  
 En miyèt din ôt su so léf,  
 Su vo lank, è d'din vo goyî ;  
 En miyèt d'in ôt pès sur vou  
     Din vo bouch ouvriy !

Chak kou k' l'èfan dira a l' tèt,  
 Sè kom s'on mtroû su l' pia d'èn bièt  
 In kôfiér tou roûch pou l' markî !  
 Sa va si pèrfon, vo l' konpèrdè bi,  
 K' l'èfan va kwâr, a s' vré bon sin,  
 Ki pô mindjî lè-z-ôtôè djîn.  
 Eski n' pouôrou nî s'il î fôûr asè,  
 Avalé l' mont t-intiér pa s' bouch èyè pa s' nè !

## VII.

### El jwin.

In bzan sur nou, in bzan in d'din  
L'ér a fé l' jwin  
Intrè l' preùmî è l'deûzièm sin,  
L' sin dou dêwoûr èyè l' bon sin.

In bzan sur nou, in bzan in d'din  
El lé fé l' jwin,  
Intrè l' twâzièm è l' preùmî sin  
L' flér èyè l' gou avû l' bon sin.

Tou l' pwa dou mont asploûy sur nou  
A tou lè kou  
K' dou lé pu bzan k' dè l'ér  
K' dou lé pu bzan k' dè l'yô  
Keûr a picho  
E rinpli no bouch kom in vér  
Ki brichôdroû,  
On di k' no ston dè pti blèfoû :  
Tou l' pwa dou mont asploûy sur nou,  
El pwa dou lé véra fé l' jwin,  
Intrè l' twâzièm èyè l' bon sin.



## VIII.

### No bowèt.

Avan dè skèpi,  
Pou n' nî broûyi l' glas dè fèrnièt,  
No-z-avon si bî stoupè no bowèt  
K' lè salè-z-yô véron yordi,  
Ki fô sakan djoû pou l'-z-ouvri.

Fô k'on lavis bi no pôpiér !  
Ki n'eûch pon d' mikrôp, ni d' pouésiér !  
Minm kè no pârin ou bî no mârèn  
Rûrin'tè dè yâr a batèm,  
No pourin' dèvni kachiveû  
Si sa n' sè dèskol nî tou seû.

## Kan 'l pèti kin...

Kan l' pèti kin ou 'l pètit kèn  
     E la ki s'inpanchèn,  
 Kan s' mouman l' ragît a s' bon sin,  
     El annyroû bi d'din.  
 El lè froû bi rintré din s' koûr  
 Ey' èl lè sèr si foûr, si foûr,  
 Es pètit krot, tou kont dè s' keûr,  
 Ki n'yara jamé d' plas pou l' maleûr !

Ey' èl lè ragît, èy' èl voûroû dja  
 Savoû l' kouleûr dè-z-î k'il a.  
 Dè s' mouman ou dè s' poupa ?



**Kan no-z-ouvron no-z-î.**

Eyè kan no-z-ouvron no-z-î,  
 Dè-z-î d'aveûl 'n miyèt broûyi, —  
 On diroû tou dè vit pâmèy  
 Ki dmeûr dèsu dèl savonéy.

Fôra lè froté konbî d' kou  
 Avû l' gran djoû ?  
 Eyè l' pètit lummiér dèl lanp  
 Ki djougèl doûla dvin l' chanp  
 Konbî d' kou sk'èl dèvra tiré  
 Sè flèch in oûr pou l' pikoté ?

In djoû pourtan, — on afutra, —  
 Vo mouman vîra  
 En sakè d' bia,  
 En sakè d' drol.

In fzan mouvé sè doû kom dè parivol  
 Ki voltè pa tou kostè,  
 Pa dvan vò-z-î  
 Eyè padrî,  
 El vwa k' vo lè tournè,  
 Kom si vo stî dja inbètè  
 Pask'intrè vou èyè l' lummiér,  
 Yaroû 'n bariér.  
 Yaroû in mùr è pon d'èskèy  
 Intrè vou èyè l' solèy !

# Fô bî deû mwa.

I fô bî deû mwa, azâr,  
 Pou k' lè parin povistè kwâr  
 K' leû-n-infan vwa.  
 Fô bî deû mwa, bî seûr, pou vîr ès mirak la.  
 L'infan pèdra  
 Din sè deû-z-î avû l' lummiér  
 El mont t'intiér.

Mè konbî d' djoû èsk'i fôra,  
 Pou k'on dizis : i rkounwa dja  
 S' mouman d'aboûr èyè s' poupa ?



## Pou kouminchî.

Pou kouminchî l' pètî moulon  
 S' ki vwa potèt  
 Kan s' moman l' prin pou lyi dné l' tèt,  
 Sè 'n sakè d' tou ron  
 Kom lè bia gro balon,  
 Ki pèdrà si voltî pu târ avû sè doû ;  
 Sè 'n sakè d' si bon,  
 Ki n'a nî dandjî d' ragidé pu lon.

Sa lyi rinpli, l' pèti goulou  
 S' grant bouch si bi k' sè deû pti-z-î,  
 Minm ki ragît bèrlu,  
 Télmin ki vwa voltî  
 L' totot yuskè dou bon lé vî.

I l' sin glichî,  
 L' bon lé tou kê dèvin s' goyi  
 Dusk'a bi lon invî s' boudèn !  
 E vla s' boudèn ki dvî tout plèn  
 Kom ô bon tan k'il î din l'û.

Il è skran a fors dè sakî ;  
 Adon, binés, i frum sè-z-î  
 Pou s' kolé kom èn sansû  
 A l' doûs pia dè s' mouman k'i sin  
 Avû s' twâzièm è s' katièm sin.  
 I l' sin télmin  
 Ki s'insklumi in annyan d'din.

### XIII.

#### Vîr klér.

On pouroû ouvri sè pôpiér  
E n' nî vîr klér !  
I ya dè kêrô d' vit si spè,  
Si nwâr krapè,  
K'èl djoû n' pas nî tout out,  
On n' vwa nî n' gout,  
Ni n' gout dè lé minm dè s' mouman  
Ki è tou blan.

Komin, adon, mon Dieû Sènieûr,  
Sk'on a l' boneûr  
Dè skèpi kom in deûzièm koû,  
Vyan t' taninkoû  
K'èl Nût è 'l Djoû n' son nî parèy ?  
Ya dou solèy !  
Vla k'on vivoû din l' nwâr tou l' tan :  
On vwa dou blan !

On vwa dou nwâr èyè dou blan  
Ey' in minm tan,  
Vla l' mont rinpli d' bèlè-z-afér,  
Rinpli d' lummiér,  
Ki djû a vni pokî vo-z-î,  
Vo fzan sondjî  
K' vo n' sèrè pu miér seû tou mètnan  
Kom vo stî dvan.

Eskè lè ridô dèl fèrnièt  
E vo-n-ossèt,  
El lanp ki vo fé dè klinièt  
El sièl potèt,  
Pou vo fé sinti k'i son la  
Rûtt in morcha,  
In morcha d'yeûs minm din vo-z-î  
Pou asplouyî ?



Sa vi asplouyi i fô kwâr  
Din in tirwâr ;  
Sè l' lummiér k'a trouvè l' jwin  
Avû l' bon sin ;  
L' lummiér ki keûr pa tou kostè  
E k'a rbômè  
D' tou sk'èl a rinkontrè in vnan  
Dèlé s' n-infan.

Tou s' ki twéf èn plas ô solèy,  
— Sè l' grant mèrvèy. —  
E si binés d'yèt insblouwi,  
E rinskandi,  
Ki n' sroû nî t'ni s' plézi pour li ;  
Sa fé ki di :  
« Alè 'm pèti, no ston d'lé vou,  
Fô rlûr kom nou ! »

## I ya dè pti-z-èfan...

I ya dè pti-z-èfan ki ouvrittè leû-z-î  
Mè ki n'intinttè nî.  
Vo fèt klakî vo lank ou bî dalé l'osèt,  
Vo tanbourinè su l' fèrnièt,  
Vo l'-z-aplè pa leû non, vo leû parlè gaga  
Eyè i dmeûrtè la  
Vo ragidan avû dè bon-z-î, kom in tchi  
Ki n' konprin nî.

Vo sintè t' taninkoû in pwa su vo stoumak,  
Vo pia s'èrsak,  
Va nè s'èrkrol, vo-z-î pikottè ;  
Vla s' moman kom sot :  
L'infan è soûr,  
I n'yara pon d'avans a lyi parlé d' daboûr !  
L'infan è soûr !



## L'èfan è soûr.

L'èfan è soûr,  
 I n'intindra nî l' tiktak dou rinvèy  
 K'on lyi mtra a s' n-orèy.  
 Sè bi èno ? on dmeûr la tou sézi,  
 Sè kom in krikri  
 Muchî din l' kèminéy èyè k'on n' vwa jamé ;  
 Sè l' mikanik  
 Ki fé tik-tik  
 In bèrlondjan,  
 Pou bat èl mèzûr dou tan  
 In deû tan.

L'infan è soûr,  
 I vîra rmuwé  
 Lè léf dè s' mouman ki vû lyi parlé  
 Tou doûsmin pou l' rapéji :  
 I n'intindra rî !

L'infan è soûr,  
 I bréra sè-z-î touwoûr,  
 Eyè s' mouman n' poûra jamé,  
 Jamé l' konsolé  
 Avû lè bon' parol kè s' moman twèf toudi  
 Pou fé kwâr a s' pèti  
 K' tou sè mô son parti.

L'infan è soûr :  
 I n'intindra jamé lè pa  
 Dè s' popa  
 Ki s'aproph dèl bèrs in rintran dè s' n-ouvrâch  
 Pou vîr s'il è sâch.

L'infan è soûr :  
N'intindra nî sou k'on dira  
Nî minm in djoû, Sin Nikola  
Ki vèra al breùn askouté  
Si pô pasé.

L'infan è soûr, l'infan è soûr :  
L' muzik dè vwa, l' muzik dou mont, l' muzik tou koûr.  
L'infan n'intindra jamé rî,  
I sra ô fon dèl kâf, èyè vou, ô gèrni !



## L'èfan intin.

L'èfan intin :

L'ér asplouÿ si fôûr su s' n-orèy,  
 K' s'è tou parèy  
 K'on rinsbuskroû su l'uch dèl mézon,  
 Kè tout ô fon  
 I ya l' bon sin  
 Ki s' dèmèfiy d' tou sè vizin.

L' bon sin vo di : fèt atinsion,  
 Vla dè djin pou vo mézon,  
 Lyè lè rintré : i vo diron,  
 Tou s' k'il on vu bî lon, bî lon.  
 L' vin ki chufèl  
 Ou bî ki eûl din lè ruwèl,  
 L'orâch ki sklèf èl sièl,  
 El pleûf è lè gèrzin ki kéyt a dik è day,  
 Dè kèrèt su l' kèmin, dè lon trin su lè ray,  
 Dè machin' ki s'in von in fzan : « tchouk » ;  
 In kayô din l'yô ki fé « plouk ».

Lyè lè rintré : i vo diron  
 Tou s' k'il on intindu bî lon :  
 Lè ramâch dè fôvèt  
 E tou lè kri, lè kri dè bièt  
 Ki s'inkeûrt ou ki s'involt  
 Din lè bo, din lè kan, lè stôl ou lè gayol :  
 Vla l' ko avû s' karikankan  
 Ki va minné sè pouy a kan ;  
 Sè l' vak ki brok kan l' krèp è vût  
 Ou l' rosiniol ki kant pal nût.

L' tchî k'è 'n bon' rakuzèt si vî in ètranjè ;  
 L' ka ki dmant ès n-asièt kan vo n'yavè rî dnè ;  
     Ou lè djîn ki past ô kmin ;  
     Lè fiy ki rîyt è lè gamin ;  
     Lè koû d' martia è d'èskorèy ;  
 L' rû d'èn bruwèt k'è tro kèrkéy ;  
     Lè bisiklèt è lè-z-ôto ;  
         Sonèt,  
         Tronpèt,  
         Eûlo,  
         Chiflo,  
         Tou s' ki djumi  
         Ou bî ki ri,  
         Tou s' ki broûy ou ki frèmi,  
         Tou s' ki è, tou s' ki vi,  
 L' grant vwa dou mont alintoûr dè li !



## Pindan dè mwa.

Pindan dè mwa, sè l' mont 't intiér ki vî a vou :  
 Pa vo-z-î, pa vo nè, pa vo bouch è vo-z-orèy,  
 Lè lon bra d' vo mouman, l'ér froû ou bi l' solèy,  
 Dè-z-ours in pluch ou bi dè pti boulom tou nu.  
 Avû tou sa on di k' vo-z-astè avèrlu,  
 Eyè tékfwa pou k' l'èfan 'n brèyis nî,  
 Sè tou lè kèstin, pou djwé, k'on lyi dnroû bi.  
 Il è binés, il è sézi, i s'amûz avû tou  
 Pindan dè mwa sè l' mont 't intiér ki vî a vou !

## Pa t' tavô l' chanp.

Il arîf in moumin kon n' sâroû pu vo tni :  
 I n'ya nî frich ni frach, i fô vo-z-inkouri.  
 Adon, kom in péyon ki tourpin' dèlé 'n lanp,  
 Avû vo-z-î, avû vo mangn, pa t' tavô 'l chanp,  
 Vo volè atrapé tou s' ki rlû ; tout atrapé,  
 Tou print pour vou, tout inpougnî, tou kulbuté,  
 Kom in vré diâl daboûr, è vo mouman d'a 'n bon',  
 Vo l' fèt dèdja dalé kom èn vyèy mant a pron'.  
 « I foûroû bî avoû sè deû-z-î padrî s' ku,  
 K'èl di, tou s' ki vwa, i mè dja 's mangn dèsu ».  
 Il arîf in moumin k'on n' sâroû pu vo tni,  
 I n'ya ni frich ni frach, i fô vo-z-inkouri  
 Tou vîr èyè tou print, tou tôstè, tou sinti.



## Si on aroû markî.

Si on aroû markî  
 Tou s' ki vî  
 Pa lè port èyè pa lè fèrnièt  
 Dè no tièt,  
 Avan k'on n' savis dîr in mo,  
 No kalpin, k'è pourtan gro  
 No moustéroû tan dè-z-imâch  
 A tou lè pâch,  
 K'on sroû sézi in lè tournan  
 Minm k'on vivroû ko pu d' sin-z-an.

Si on aroû markî  
 Tou s' k'on a vu èy' intindu  
 O trèvi d' tou s' k'on a sintu  
 E ki a vnu  
 Pa lè port è lè fèrnièt  
 Dè no tièt,  
 No kalpin, k'è pourtan gro  
 No moustéroû tan dè-z-imâch,  
 Tan d' griboûyâch a tou lè pâch,  
 K'on sroû sézi in lè tournan,  
 Minm k'on vivroû ko pû d' mil an.

## E dja sondjî...

E dja sondjî a sk'on di d'in èfan  
 Avan ki n' fuch kapâp dè parlé a s' mouman ?  
 Kan il è ko fachî, si pîtèy din sè brây,  
 Adon 'st in fameû pway :  
 « Ba ! i vû 's mèt a s' n'és ».  
 E vo vla fin binés !

Si vo fé dè rizèt, kan vo kakyè 's minton,  
 Vo dit : « A ! mon dieûdon  
 Kom il èst amityeû ! »  
 E vo vla fin eûreû !

Kan l' marmo bré a larm, kom si sèroû foûr tris  
 Mè sè pou k'on l' pèrdis :  
 « Il è dja avisieû ! »  
 E vo vla ko eûreû !

L' pouf mouman k'a d' l'ouvrâch dwa l' tènî su sè skoû  
 Tékwfa t' tâlon du djoû :  
 « Poukè yèt inbètè,  
 I fé l' pèti wastè ! »

Si l'èfan fé 'n sakè môgrè vou è vo din,  
 En sakè k'on dèsfîn :  
 « St-in futè, st-in malin ! »  
 E vo vla fin kontin !

Eyè pou rî du tou si krîy kom in fichô,  
 Il aroû peû dèl l'yô-;  
 Vo dit ko bî la dsu :  
 « Ba ! sk'il a bî din l' tièt, i n'èl l'a nî a s' ku ! »



Sa fé k'on twéf toudi,  
Minm k'il è ko tou kru padri sè deû-z-orèy,  
K'il è dja tou parèy  
A lè gran in stan pti.

Il a dè kalitè èyè dja dè dèfô ?  
Voûri l' vîr inosin  
Kan s' sètièm sin  
Tourpin' in d'din  
Pou moustré k' lè chi-z-ôt travaytè kom i fô ?

## Kan l'èfan va ranchné ô feu.

Kan l'èfan va ranchné ô feû,  
 S'èst a li, èno, lè bidon,  
 — Tou lè bidon  
 D'èl mézon, —  
 On lyi di « Brûl » in lè rsakan.  
 On lyi fé peû  
 In lyi fzan dè gran-z-î kom si on sroû mèchan.

Mè vla k'in djoû l'èfan a vu  
 Lè boul dè l'èstûf, tou parèy,  
 Télmin k' sa rlû, a dè solèy  
 Dè pti solèy, k' pou atrapé  
 N'ya fok k'a mèt ès mangn dèsu.

Eyè l'èfan krîy t' taninkoû.  
 Il a sintu ô d' bou d' sè doû  
 En sakè ki pinch si foûr  
 Dèspû sè doû s' kô fon dè s' koûr,  
 Ki pinch si foûr è lyi fé mô,  
 Ki djumi kom in djèrô.

Abîy ! Abîy ! Vnè souflé dsu  
 Moman !  
 Vnè dné in bètch ki n'uch pu mô ;  
 Abîy' 'n priyér a Sint Ernèl  
 Ou rklamè « Notre Dam du Sièl »,  
 Ou bî Sint Agapit dou Moulin d' Sin Vô.  
 Abîy moman vnè souflé dsu,  
 I ya pou kwâr k'il a s' mangn dju.

L'èfan s'a brûlè,  
 I sara bî s' kè sè ;  
 Mè lè vla kom ô fon d' l'infiér,  
 S'èst in afér !  
 Bon' Sint Avièrch kèsk'on va fé ?  
 Sè l'èfan ki a mô, èyè s' moman ki bré !



**Fû-û..sa brûl..**

« Fû... û ! sa brûl èl lanp,  
 Sa brûl lè-z-alumèt,  
 Sa brûl, kolô, alô douïsi ».  
 Eyè vla l'infan ki s'arèt :  
 « Sa brûl, sa brûl » : il a konpri.

Konprint dè parol  
 Sè 'n sakè d' drol.  
 E dja sondjî k'èl téèzèt è l' sinéma  
 N' son rî a kostè dè s' djeù la ?

Vo-z-avè parlè,  
 Sè d' l'ér k'avè souflè.  
 Kom avû in kayô  
 K' vo rûrî din l'yô,  
 Vo-z-avè fé èn mas dè ron  
 Ki s'inkeûrt in s' pouïsan, lôvô duskô pon.

Lè kuléry dou pon sè vo deû-z-orèy,  
 Sè tou parèy  
 K'on rinbuskroû su l'uch frumény  
 Pou rinvèyî tou l' mézon.  
 L' mo « brûl », sè 'n déréy  
 Ko pu bzant kè dou plon  
 Esk'i n'a nî froûchî vo dou èyè vo keûr ?  
 Brûl sè 'l maleûr  
 Avû s' kléron !  
 Brûl sè l' pwa din l' platia  
 Dèl balans dou sètièm sin,  
 Eyè l' sètièm asploûy si fôûr  
 Su l' preûmî k' sè no bon sin,  
 E su l' deûzièm, 'l sin dou dèwoûr,  
 Ki no rtî pa l' djakèt  
 Kan no dalin' pokî no tièt  
 Ou ko pu pîr, kèr pa l' fèrnièt !

## No d'avon sèt.

Pou dir d'èn saki k'il è 'n miyèt so,  
 In Fransè 'n mank nî d' mo :  
 « Mastouch, maboul, balo,  
 Toktok, dingo ».  
 Si vwa in maleûreû ki aroû sa d' nésans :  
 « I n'a pa pu sè « cinq sens ».

In Walon, li, dira : « il è 'n miyèt simplo,  
 St'in sinbèrlo,  
 In inosin,  
 Ou bî, paski pal djus, i dira ko ètou :  
 « I n' lè-z-a pu t' tèrtou ! »

« I n' lè-z-a pu t' tèrtou ».  
 I sè bî, li, l' Walon  
 Kè no d'avon pu d' chonk.  
 D'yun k'èst inosin,  
 On di a pour du bon :  
 « I n'a pu sè sèt sin ».

No d'avon sèt  
 Kom i ya sèt bowèt  
 A no tièt,  
 Pou rintré l' grangn din no gèrnî !  
 Pa no deû-z-î,  
 No deû-z-orèy, no deû trô d' nè  
 Eyè no bouch k'è grant asè  
 Pou avalé dè pun, dè l'yèrp èyè dèl châr,  
 On mtrouû bî tout a s' pans, azâr !  
 On mtrouû bî tou din s' tièt  
 Pa lè sèt bowèt.  
 On è tèlmin, tèlmin si fiér  
 K'on avalroû èl mонт 't intiér !



## Sè nî ko asè.

Mè sè nî ko asè,  
 A no-z-orèy, kom in mètsin,  
 Pou bì savou s' ki s' pas in d'din,  
 No mton dè-z-askoutou  
 Kom dè ralonch ô d' bou d' no dou.  
 Ey' on intin  
 Parlé dè djin  
 O diâl a l'ôt dèbou dou mont  
 Kom s'il in'tè la tou kont.  
 Sa fé k'èl mont dèvi si pti,  
 K' no vla, nou-z-ôt, t'tôsi gran k' li.

Pa dvan no-z-î, mtan dè lunèt,  
 No vyon d' lé nou s' ki è bì lon.  
 No ragidon  
 Si lon, si lon lôvô din l' sièl  
 Yusk'on vwa l' Bèl  
 Eyè lè stwal ki son si bèl  
 K'on è sézi  
 Dè s' vîr si pti !

No ragidon  
 Dèvin 'n gout d'yô  
 Din 'n gout dè san ou bì in chfeû  
 Dèvin l' solèy, kè sè dou feû,  
 Eyè no vyon  
 Tan dè-z-afèr a dèvni so  
 K'on n' sé nî ko  
 Si nou, lè-z-om, no ston pu gran  
 In ragidan èy' in pinsan,  
 K'èl mont k'on n'in vwa ni l' dèbou,  
 E k' no mzuron  
 Avû 'n balans padrî no fron !

**Lè-z-ingrènâdch.**

E dja vu lè-z-ingrènâdch kan on l' dèsmont  
D'èn vyèy orlôch ou bî d'èn mont ?  
Ragidè l' klikè  
Ki dèskin èyè ki mont  
Pou rlachî d'in kostè  
Eyè rastèni d' l'ô, t,  
San fôt,  
Lè din ki tourntè  
E ki s'inmanchtè  
Pou fé tourné lè-z-ègîy !  
Ebi ! no viy,  
S'èst in vré moûvman d'orlojrîy.



**'L preùmî èy èl deûzièm sin.**

In kayô ki vo spotch asplouy dèsu vo pia ;  
 Vo feùm ou vo n'èfan k' vo sèrè din vo bra ;  
 Tou vo chagrin ki péstè kom in sa  
 D'èskalo su vo do è vo kouptè vo rangn ;  
 Tou s' kè vo sintè d' sèk ou bì d' kra din vo mangn  
 Tou s' ki è rût, tou s' ki è kê, tou s' ki è froû ;  
 Lè karès dè vo tchî ou lè sièn du poupoûs,  
 Lè doû d' vo pti garson kan i vo fé 'n doudoûs,  
 Kan èl vo don' in bètch, lè léf dè vo koumér,  
 Tou s' ki vo touch, tou s' ki è bzan ou bì lidjér  
 Sè l' pwa ki mè in rout 'l klikè dou deûzièm sin,  
 Kom pou dalé prévni, tout ô fon d' nou, l' bon sin.

## 'L twâzièm èy èl katièm sin.

S' kè no mindjon, s' kè no buvon pou nou-z-ôt vif  
 S' ki fon din no kranè ou bi din no salif  
 Kan sroû dèl tèr kè no mindjrin',  
 Dè pousiér dè tèri minm kè no sintirin' ;  
 Tou s' ki vi din no bouch, tou s' ki key din no trô  
 Si pti, si fin kè s' fuch, asploûy kom in kayô,  
 Sa fé kè no twâzièm èyè no katièm sin,  
 K' leû klikè è mûchi doûla n' sadju in d'din  
 Von s' mèt a fé tourné tou leû pti-z-ingrènâdch  
 Kom a l' dukas, sè bi k'on vwa dè kèrbènâdch  
 Ki klikott' a pou rîr : t' taninkoû sè fini !  
 Chak koû k' vo rkouminchrè vo-z-arè dou plézi  
 Si vo dit : sa m' chèn bon ; mè, vo sèrè monvé,  
 Si, in fzan dè grimas, vo trouvè k' sa sin mé !



## 'L chonkièm sin.

El deûzièm, èl twâzièm, èl katyèm sinttè l' pwa  
 D'èn tout pètit sakè ki kény su leû platia :  
 L' chonkièm, li, sè 'n balans, mè nî t'tafé parèy,  
 Intrè li è s' ki è, il a mi deû-z-orèy,  
 Kè sè kom deû kornè k' dè soûr on pou intint.  
 S' kè sè d'in anpli 'n n'è nî dandji d' l'aprint :  
 L' chonkièm, pu malin k' tou lè-z-éléktrizyin,  
 A seû indvinté, pou lè bièt kom pou lè djin,  
 En vréy bwat a muzik pou bî rsèvwâr lè-z-ont,  
 Eyè s'on skoufèt l'ér ki vî rinbuskî kont,  
 Vla k' sè ko pîr pou l' chonkièm din no tièt  
 K'on taproû dou martia su lè klô d' no foslèt :  
 Sa rbôm kom èl kanon, tou triyan' din no koûr,  
 S'èst insi k'èl chonkièm intin l'orâch d'aboûr.

Mè il intin la mèr din dè grossè kakay  
 Lè fil dou tèlèfon' èyè leû pèrtintay  
 Din lè gran nwâr potô stanpè tou l' lon dè kmin ;  
 Il intin 'n mouch ki vol èy' in amton ki broûy  
 Kom dè-z-aréyoplân' ou bî kom in zèplin ;  
 Avû in sèya d'yô i kwa ki plû arloûy ;  
 Il intin deû pièro, i di ki d'a 'n voléy ;  
 Il intin 'n bal chufflé, i pins kè s't in arméy,  
 I kwa k'on a kriyi kan pèrson' n'èl l' rapèl,  
 I jurra k'il intin parlé l' bon Dieû ô sièl !

## 'L djeû dou chonkièm sin.

Pou mieù raskoyî 'n bal, no stindon fouêr no doû,  
 Pou mieù raskoyî l' son, t' t ô fon d' no-z-askoutou,  
 L'nèr dou chonkièm stin bi lè sî étou.  
 I da pu d' dîz, savè, k'on llyeû fou 'n bon morniaf !  
 Sa fé k' sè kom nou-z-ôt kan no pokon no kwès :  
 No sinton k' sa pikot è k' sa rmont din tou l' rès  
 Dè no bra sk'a no spal : li, i 'n dèmeûr nî paf :  
 A pèn k'il è touchî, sa rbôm dèvin no tièt  
 E 'l dèrnî sin, 'l sètièm, ki 'n vû rî léchî pièrt,  
 Rlans èl bal yusk'i sé, ou di k'èl è monvés,  
 Mark in kins ou bi l' djeû, èy' il è fin binés  
 Paskè s'on l' léroû fé, li, i vo ramasroû tou  
 Tou s' ki rmû, tou s' ki vi, tou s' ki trinn su l' damâch  
 Télmin k'il aroû peû kon vièn vo fé dou mô :  
 « Atinsion, ki vo di, a s' ki arif lôvô » !



## Deû vré pti-z-aparèy.

Tou s' ki n'è nî nou-z-ôt èyè ki vî a nou  
 Potèt pou no spotchî ou rî k' pou no touchî ;  
 Tou s' kè no pourin' print rî k'in stindan no kou  
 'n sakè d' bon a sinti, 'n sakè d' bon a mindjî,  
 No ll'avon bî a bèl, èno, pou lè rkounwat :  
 Sa kol a nou kom a dè vré bagèt dè glû  
 Mè tou s' ki n' s'arèt nî, tou s' ki keûr a kat pat,  
 Lè pun d' koupèt k'on n' koy nî kom on vû ?

Ebî, lè pti mouchon ki pastè pa voléy,  
 No tiron leû portré pou mèt su no kminéy ;  
 Sa fé k'in djoû ou l'ôt kan no d'aron dandjî,  
 No lè rkouniron bî in dalan a l' tindriy.

Pou tiré l' mont t'intiér in portré, no-z-avon  
 Deû vré pti-z-aparèy muchî pa dzou no fron ;  
 On s'in chér kan on vû, pal nût si bî k' par djoû,  
 Kan i fé klér dè Bèl ou bî in plin solèy,  
 No-z-ouvron no deû-z-î, no lè frumon : koukou,  
 N'ya nî d' mouchon ki vût : on n' vwa fok dè mèrvèy !

# El lummiér fé dè-z-imâch...

El lummiér fé dè-z-imâch  
 Branmin pu bèl ô tablô  
 K'in mét d'èskol.  
 Vo-z-i n'on nî d' pinsô  
 Eyè sè 'n sakè d' drol,  
 I mètè dèl kouleûr  
 E dou vèrni pa dzeûr  
 Pou k' sa rlûjis  
 Kom i n'ya pon d' drogis  
 Ki saroû vo-z-in fé  
 Kan vo dalè d'akaté.

I fèttè dè dèsin  
 Branmin pu bia k' tou lè-z-imâch  
 K' lè kurè don't a lè gamin  
 Ki son bî sâch.

I fèttè dè-z-imâch si lidjèrt è si klér,  
 K'on diroû ki ya d' l'ér  
 Intrè tou lè moncha.  
 I ya d' l'ér t' tavô la  
 Ki frèmi è ki djougèl  
 Kom in èfan, din l' chanp,  
 Intrè lè ganp  
 Dè s' popa pou s'amuzé.  
 I ya d' l'ér ki vû tou karèsè  
 E minm vo dné  
 Dè pti bètch su vo machèl.



# O fon d' vo deû-z-î.

E dja bi sondjî  
 K'ô fon d' vo deû-z-î  
 L' lummiér dèl lanp ou dou solèy  
 Fé n' mas dè-z-imâch san parèy ?

E dja bi sondjî  
 K'ô fon d' vo deû-z-î  
 Pu d' dî mil kou par djoû  
 Su vo n'ardwâz on dèsfas tou ?

Kan on è pti sibî k' kan on è gran,  
 Komin s' k'on n' sroû nî skran  
 E k'on n' sintiroû nî  
 Dè pournéy d' sâp dèvin sè-z-î ?

Vo-z-î on tan frotè  
 Kom vo feûm pou bi rnètyî,  
 K' leû bra son dèspindu  
 Eyè k'ô nût pou dalé kouchi  
 I n'in vûttè pu.

Vo-z-î on tan frotè  
 Ki kéyt avû vou, asoumè !

## Imâch dè Sin Nikola.

Avû sè bèlè-z-imâch la,  
 — Dè-z-imâch dè Sin Nikola, —  
 No pouïron dalé a l' rinkont  
 Dè tou s' kè no vouïrin' ô mont.

Kan no diren ô trin, in vyan lè-z-arp kouri,  
 Lè fil dou tèlègraf ki mont't è ki dèskint't  
 E lè potô k' pou leû-z-aprint a s' rastèni  
 Kom dè chanpèt, ki lè kalincht'  
 No ston sézi !

Sè no tireû d' portré  
 Ki a volu no trompé  
 E ki no-z-a dnè pou no-z-amuzé  
 Dè bèlè-z-imâch in anvé.

In ragidan in l'ér no vyon kom in plafon  
 Avû dè bia nuâch kom dèl wat,  
 Ou bi tékfwa tou nwâr pusdi ki djûtt' a s' bat ;  
 Eyè no dzon  
 K'èl sièl sè 'n mézon  
 Avû in gran gardin k' sè l' paradi tou plangn  
 D'anch, d'avièrch èyè d' sangn.

Kan i djèl fôûr in iviér  
 In ragidan ko in l'ér  
 Pal nût tou lè ptitè lumrot  
 Ki klignott', —  
 Sè kom lè klô d'èn grant kalot  
 Lè stwal ô stwalî, —  
 L' tireû d' portré mè din no-z-î  
 Dè-z-imâch ki son si bèl,  
 Si bèl, si bèl kè no pinson  
 Kè no 'n vivon nî dvin 'n prîjon  
 Pa dzou l' gran sièl !



**Tireû d' portré d' dukas.**

Kan in tireû d' portré d' dukas  
Vo-z-a rlèkî,  
I vo mous, tou kontin, kom din 'n glas,  
En bèl imâch ki fô payî.  
No-z-î, yeûs, no-z-î  
T' tîsi râ t k'il on fé  
In bia portré,  
I keûrt abîy kom dè gamin  
Moustré l' bèl imâch ô vizin  
K' sè no sètièm sin !

## Pou dèvni rich, pou dèvni sâch.

L' preûmî  
 N'a nî afé d' vûdî  
 Pusk'on vî tou lyi rakonté  
 E k'il a dja branmin a fé  
 Pou li rmèt èl pangn droû èyè tni l' mézon dwat.  
 L' sètièm, infrumè kom din 'n bwat  
 Travay in wô  
 Din lè bûrô.

Din l' tan s'astoû in anpwayè  
 K'i ô gichè ;  
 I rsèvoû 'n mas dè yâr  
 E 'n mas dè biyè d' bank, azâr,  
 K' sî tou lè-z-imâch kè lè sin  
 Lyi moustrin't pou dalé in d'din.  
 Parlé a no bon sin.

In djoû,  
 L' non dè djoû,  
 Kom in anpwayè d' bank ki djû a l' bours ètou,  
 La ki s'a pasè dou patron  
 Ki dmeûr toudi i' tô fon  
 D'èl mézon ;  
 I n'a pu seû s' rastèni  
 D' wardé branmin dè liâr pour li.  
 Il a fé li minm dè-z-imâch  
 Ey i no lè-z-a dnè  
 A volontè,  
 Pou dèvni rich èyè pou dèvni sâch !



**Kont dèl fèrnièt.**

No sètièm sin kom èl preùmí,  
Yun a l' kâf l'ôt ô gèrnî,  
Son bî rinkulotè in d'din  
Mè lè chon-z-ôt, dè gran kurieû,  
Avisieû,  
Pou mieù vîr tou s' ki pas ô kmin,  
Vièntè su l'uch dè leû mézon  
Ou bî s' mètè kont dèl fèrnièt  
Dè no tièt.

## Fok k' in idéy !

Avû tou lè-z-îmâch k' no-z-î vièntè moustré  
 A no sètièm din l' chanp d'in wô,  
 Kè volè ki povis fé  
 D' bi kom i fô ?  
 Fok k' in idéy !  
 Vo-z-ari in portré  
 D'èn feùm kè vo 'n kounichî nî,  
 K' vo n'avè jamé vu èyè jamé parlè.  
 Mèton k' vo voûrî vo marié  
 E k'èl n'aroû nî ko trouvè :  
 Eskè vo n' poûrî nî  
 L' vir voltî ?

Ya dè mariâch pa lè gazèt,  
 On n' sè kounichoû nî,  
 Ni dou ku ni d'èl tièt  
 Mè pask'on a li dè lèt  
 E k'on a vu in portré,  
 On s' fé si bi a l'idéy  
 K'on s' léy apwayî :  
 Vo vla ètou din l' konfrérîy !

Dieu sé sou ki s' pas par aprè...  
 On di ki d'a ki son tronpè !  
 Ki s' ki n' l'è nî ?  
 Kan on aroû ko frékanè  
 Pindan dî-z-an, on l' sroû ko bi.  
 Sè la vîy !

Avû tou lè portré  
 K' no-z-î vièntè moustré  
 A no sètièm din l' chanp d'in wô  
 — K' sè no sèrvô, —  
 Kè volè ki povis fé  
 D' bi kom i fô ?



**In pèrdan 'l gran ramon.**

Dju vo ll'é di, no sètièm sin  
A fors dè vîr tan dè-z-imâch  
A tou lè pâch,  
Dè s' gran kalpin,  
I s'a mi ètou a d'in fé, kom in èfan  
Ki ragît ès mouman  
Ramouné l' mézon,  
E voûroû tou brouchté in pèrdan l' gran ramon.

**'L Kâr al dèblouk.**

In djoû, par azâr, vla no tièt inskôféy  
 Pou 'n rézon ou l'ôt :  
 Vo-z-avè in idéy ?  
 Sè parèy a du lé, ô feû, dèvin l' kalôt.  
 Vo sê bî k' sa mont fèl :  
 Sè l' minm din vo sèrvèl.  
 Si sa pouûs ôsi foûr k'in portré din vo-z-î,  
 Vla l' sètièm sin ki travayra :  
 I fra 'n bèl imâch avû sa,  
 In imâch kè vo vîrè  
 Kom lè portré èyè k'il invoûyra,  
 In fzan 'n pètit vwa,  
 A tou lè djîn k' vo lyeû parlè.

In ôt kouû, sè dè mo  
 Ki rinttè kom dè so  
 Din vo sèrvèl avû leû gro chabo.  
 I péstè avû tou leû pwa  
 Din l' tiyô d' vo-z-orèy ;  
 Sè tou parèy  
 Ki manbournrin'tè l' sètièm sin  
 Ki prin moûr a din.  
 I n' fô nî pu k' sa  
 Pou mèt tout a dalâch  
 Sa fra ko 'n mas d'imâch,  
 — Dè-z-idéy si vo volè, —  
 Kè vo dirè  
 Pa tou kostè !

Kan l' mikanik è bî in rout,  
 Kom in kâr a l' dèblouk,  
 Vo n' sarî pu l' rastèni  
 Nî dir sou kèl kâr va dèvni.



## Sèt inmanchî.

Vo sèt sin, i son inmanchî  
 Nî tan seûlmin pou ramadjî.  
 S' ki s' pas in d'din ou in dèwoûr dè vo karpint  
 Mè pou vo dir dè vo rsakî  
 Ou d' fé 'n sakè, abîy, abîy.  
 Vo n'avè nî yeû l' tan d' konprint  
 E vo mouftè.  
 Sa vo fé dou bî :  
 Bwâr, mindjî,  
 Ou bî l' kontrér : vo sê bî kè...  
 Vo dèsfint, ou atakî,  
 Dormi, krèchî ;  
 Fé dè djonn è lè-z-alvé  
 Eyè aprè... vo-z-in dalé  
 In fruman vo-z-î  
 T' tôsi bî  
 K' kan vo stè vnu  
 O mont doûsi, a ku tou nu !

## Mè vo sètièm...

Mè vo sètièm, li  
 Avû l' chonkièm è l' sîzièm sin,  
 — Sè deû pu prè vizin, —  
 Avan d' dîr : yû ! a vo karkas,  
 Pou mieû vo fé vîr sou ki s' pas,  
 Va vo moustré tan dè-z-imâch  
 Tan dè portré,  
 I va vo fé tan dè ramâch,  
 K'avan d' fé  
 S' kè vo bon sin vû koumandé,  
 Vo vo-z-amuzè  
 A askouté, a ragidé  
 In pti anvé !

Vo ragidè,  
 Vo sondjè,  
 Eyè tékfwà  
 Vo dmore la  
 Tout insbarè.



**Din 'n trap.**

Ragidé lè-z-imâch,  
Tourné lè pâch,  
Spèpyî lè mo,  
Mèt in kulo  
A l' plas d'èn lif su vo balans,  
Paskè yun d' vo sèt sin par la  
N'a pon d' konfians,  
Il a sintu  
Ki ya dè fô pwa  
E pou vo l' moustré,  
I poûs avû s' doû su l' platia.  
Vo bon sin, tou pièrdu,  
N' sè pu ayu drap :  
Vo kèyè din 'n trap !

Pou in vûdî,  
I fô tékfwà branmin kachî :  
I fô pîtyî,  
I fô rpèzé :  
I fô pinsé !

**Avû 's lavèt.**

Tou lè-z-idéy, sè dè-z-imâch  
Ki vo moustè sou ki fô fé  
Souvin s' n'è fok k'in gribouyâch  
Kè vo bon sin n' d'a nî afé.

Eyè li, si n' d'a nî dandjî,  
L'idéy 'n vo chèrvira a rî ;  
L' bon sin véra avû 's lavèt,  
Dèsfasé l'ardwâz din vo tièt.



# Kom in bouchî.

Lè stwal èyè l' solèy i pést avû l' lummiér  
 Su nou-z-ôt pa no-z-î ;  
 L' sièl kè s' n'è fok dè l'ér  
 Mè su no do  
 Pu d' sin kulo ;  
 Kan lè nuâch 's mèt't' in kolér,  
 E ki ton't a tou skèté,  
 I pést asè su no pia  
 Pou l' fé pèté ;  
 I randouytè tékfwa si foûr,  
 K' no kriyrin' bî ô skoûr  
 Télmin k' no-z-aston oûr dè nou :  
 No-z-avon peû ki no spotchistè kom dè poû.

Kan no mindjon,  
 Kan no sinton,  
 K' no ragidon, k' no-z-askouton,  
 El mont t'intiér asploûy sur nou.

No preûmî sin  
 Li, k'èst in d'din,  
 Sè l' pwa d' no keûr è d' no-z-ocha  
 Avû tou s' k'on intas din s' sa :  
 No kontintmin  
 E no chagrin.

L' sètièm, i sin l' pwa dè-z-idéy  
Ki viènt' avû dè mo din vo tièt inskôféy.  
I sin l' pwa dè-z-imâch,  
E kan lè-z-ôtè djîn avû leû bèrdèlâch,  
Leû djès è leû muzik,  
Viènt' asploûyî sur nou ètou,  
Il aspwèf dè tou bzé,  
Minm si sa n' vô ni n' chik.  
Yusk'i va ké sè pwa, i n'ya pèrson' ki l' sé,  
Mè l' dannè  
E si télmin futè,  
Kom in bouchî ki péz dèl châ,.  
Ki vo-z-in mè toudi 'n miyèt pu k' pou vo liâr.



## Pèrdè vo pil, èm fi !

Ya dè-z-osti  
S't in vré plézi  
Pou s'in chèrvi.

En pil pou fouyi vo gardin,  
El è lidjèrt ou bì trop bzant ;  
L' mans è tro gro ou bì tro fin,  
L' pognéy tro ptiit ou bì tro grant,  
L' tayan skardè ou bì rbrougnî,  
Tékfwà l' fiér è mô inmanchî.

Mè dmandè a in gardinî  
Si travayroû avû in ôt  
K'èl sièn k'il a chwazi a s' mangn  
E ki fos avû a s' mô  
San jamé sinti sè rangn !

Vo sèt sin sè dè-z-osti ;  
Vo n' lè-z-avè nî chwazi,  
Mè si vo-z-apèrdè a bì vo-z-in chèrvi  
Din vo sèrvèl vo vîrè lvé,  
Vo frè pousé  
Dè-z-idéy  
Kom dè légum din 'n tèr bì travayéy.

Bzant ou lidjèrt, pèrdè vo pil èm fi !  
Inpougnè vo-z-osti,  
N' lè léchè nî  
S'inrouÿi.

S'èst in fouyan k'èl fiér glich bì  
In ragidan, vo skurrè vo-z-î,  
In askoutan vo-z-arè 'n fin' orèy  
Ey' in pinsan vo trouvè dè mèrvèy !

# In Om.

Si vo-z-astè kapâp,  
 Kan vo-z-avè bi din vo tièt  
 In idéy d' diâp  
 Eyè k' vo fèt  
 Dalan ô trèvi d' tou, a vo môl, —  
 I n'ya pon d' sians, èno, a fé l' minm kè lè-z-ôt, —  
 Vo srè in Om !

In Om !  
 Ki sé dompté lè bièt  
 Pou lè fé travayî èyè pou lè mindjî !  
 In Om !

Ki fé dou pangn avû dèl l'yèrp  
 E mè dè pun su lè pumî.  
 In Om !

Ki pas lè mèr  
 E ki va si pèrfon din l' tèr  
 K'il in sak dou kèrbon.  
 In Om !

Ki mont ô sièl  
 In aviyon,  
 E ki dira, si fô, din l' Bèl,  
 Pou agrandi 's mézon !



## Sèt dèsmanchî.

Kan vo stè vnu,  
 Poustan vo tièt pa dvan vo ku,  
 Vo-z-astî dja 'n sakè d' vivan  
 D'din vo mouman,  
 Mè vo n'astî nî ko 'n saki ;  
 Vo l' dèverè pindan vo vîy,  
 Si vo konpèrdè bî  
 Kè vo stè vnu 'n minut ô mont,  
 Pou l' kounwat èyè l' vîr voltî,  
 Pou fé vo pâs su tèr è minm ko pu k' vo kont.

E kan vo-z-arè fé,  
 Vo rmètrè vo-z-ostî èyè vo rindrè l'ân :  
 Sè l'ér ki vo fé vîf oùr dou koûr dè vo mam.  
 Mè vo srè ko n' sakè d' vivan  
 Vo-z-in dirè lè pî pa dvan,  
 Din l' pans tout ront d'in ôt mouman :  
 El Tèr,  
 L' Solèy, lè Stwal, tou l'univèr ;  
 Vo srè l' minm châr, vo srè l' minm san,  
 Vo vivrè ko mè vo n' sintrè pu rî,  
 Pusdi k' vo sèt sin sron t' tafé dèsmanchî.

# D' tou s' ki è ô montreù dè Dieu.

D' tou s' ki è ô montreù dè Dieù,  
 No sèt sin avû leû djeù,  
 N' pouïron pourtan jamé, jamé,  
 Ké no-z-in dné 'n pètit idéy.  
 D'a minm ki dîtè k' sè 'n fayéy l

No-z-aron bèl a dîr, no-z-aron bèl a fé,  
 No sèt sin moustè dè portré  
 E dè portré, no l' savon bî,  
 Sè dou papî,  
 Sè dè minteûr,  
 Minm ki srin'tè mi in kouleûr.

No sètièm sin,  
 Sè nî s' ki è nèrî, k'il intin,  
 Pusdi k' no-z-orèy èyè s' ki vî d'din  
 Sè l' minm k'on parlèrôû  
 Din in vér dè lanp in dizan « wouwôû ».  
 Kriyî din in buja,  
 Eskè sa rchèn ko a no vwa ?

No sètièm sin,  
 Kan vo nè  
 Lyi di s' k'il a flérè,  
 I n' sé nî ko nèrî s' ki è :  
 Tou n'a nî pasè  
 Din l' saklo ô kafè.



No sètièm sin,  
Kan vo lank di s' k'èl a goustè,  
Adon i sara apôprè  
Sk'on no-z-a dnè.  
Si sè n' sakè d' bon  
K' no mindjon,  
Adon, s' ki è  
S' ki è din l' mont yuskè no ston,  
No sintiron s' kè sè  
Pusdi k' sa dvî l' minm kè nou-z-ôt :  
No preùmî è no sètièm sin,  
Fin kontin,  
Féttè l' jwin l

## Mét dou Mont.

Mè paskè lè-z-Om on pinsè  
 A s' ki vwat alintoûr dè yeûs,  
 E k'in djoû il on asprouvè  
 Pou rint leû fumèl pu eûreûs  
 D' dîr s' ki pinsin't a leû vizin,  
 Il on yavnu, pa leû sèt sin,  
 In mtan 'n solît ralonch ô dbou  
 A konprint èl l' fin fon d' tou.

A konprint tou s' k'on vwa ô mont :  
 Lè stwal èyè l' solèy ;  
 Tou lè mèrvèy :  
 La Mèr è sè pèchon, la Tèr è sè kayô ;  
 Lè mouchon ki voltè wô,  
 Lè-z-arp, lè fleûr èyè lè-z-yêrp  
 Avû tou lè bièt  
 Ki dmeûrt in ba,  
 Kouran par si, kouran par la ;  
 Avû tou lè djîn  
 Ki groûytè tou mètnan a miyâr è a sin  
 E son dèvnu gras a leû sètièm sin  
 Kom dè-z-ouvri ki travayt' a leû kont  
 Lè Mét dou Mont.



## In mo dè rmèrsîmin.

Fré walon, dju n' sé nî si 'm lif vo-z-a bî plé.  
L'avè trouvè bia ou bî lé ?  
Si vo n' m'in volè nî  
D'avou tékfwà pokî vo-z-î  
Kan vo lizî tou mè skrivèt ;  
E si, potèt, —  
Pask'èl vo chènt a l' fin pu prop kè dè pâkiér  
Ki s'in von tout fiér  
Avû leû lonkè rôp èyè leû blan solé, —  
Vo lè-z-avè ragidè pasé  
E s'indalé,  
In tou sondjan è souriyan,  
Kom kan on vwa in bia èfan.  
Volè m' fé in plézi ?  
Dît mèrsi avû mi  
O sî k'a inprimè mè di !  
S'èst in Om dè Martch lé Skôsèn  
Ki vi a L' Louviér pou gannyî 's kinjèn  
Ou bî sè krout, si vo volè,  
In travayan a l'atèliè  
Su lè machin' a inprimé.  
Kwak i fuch pèti,  
S'èst in solît konpér kom on d'in vwa par si  
E ki m'a fé pinsé, èl seûl kou k' dju l'é vu,  
A lè rokteû k'on l'ér tièstu  
Pusdi ki lyeû fô  
Toudi tapé su dè kayo  
In savan bi pourtan k'al fin il aviéron.  
Dju n' sé nî 's non,  
Dju n' l'é fok vu k'in kou  
Pou lyi spliki kom dju skrivou  
In rprézintan tou djus lè son  
E rî k' lè son din no walon,  
— Ebî,  
I fô kè s' fus in bon ouvri  
L'Om k'a seû fé sa a 'l machin' ?

Sè bi lè grant bèlè machin'  
A konpôzé  
K'on fé  
En lign d'in kou in karaktér ?  
Sa fé k' sè l' minm afér  
K'il aroû koulè in plon  
Tou s' kè d'é gribouyi, mi, avû in krèyon,  
Lèt aprè lèt,  
Mè branmin pu rèt  
E branmin mieù in mtan bi tout a plas,  
Ki n'ya ni in chfeû ki dèpas.

Alzin mè di,  
Alzin mè-z-èfan, Marsèl vo-z-a mi  
Dè bèlè lok  
Vo stè fin prop ;  
Mè vo n' l'arî ni stè si in ouvri walon  
N' vo-z-aroû ni kondwi li-minm al porsésion.



## Dè kè s' k'on pal.

### L

## El Kanson dèl Nût.

I.	Nût dè Nowé . . . . .	13
II.	El Nût . . . . .	15
III.	Toûr dè paspas . . . . .	16
IV.	Djoû èyè Nût . . . . .	17
V.	Pèrdè vo deû-z-î . . . . .	19
VI.	Vo-z-avè di : « Nonté » . . . . .	21
VII.	Klér dè Bèl . . . . .	23
VIII.	Dju vo-z-é di . . . . .	25
IX.	M'èl vo-z-afort . . . . .	26
X.	Kan Djoû è Nût . . . . .	27
XI.	Kan l' Nût mètra . . . . .	32
XII.	I n' fô nî dîr dou mô dè bièt . . . . .	33
XIII.	Ka èyè sori . . . . .	34
XIV.	Si vo-z-arî . . . . .	36
XV.	Aprè 'l Sin-Nikola . . . . .	37
XVI.	Din 'l tan . . . . .	38
XVII.	Avû lè leû... . . . .	39
XVIII.	El Nût véra alumé . . . . .	41
XIX.	Klér dè Bèl su 'l Néch . . . . .	43
XX.	Ayé... . . . .	45
XXI.	Sè pal nût . . . . .	47
XXII.	Môgrè lè rat èyè lè leû... . . . .	48
XXIII.	Vèlla avû vou bî pèrfon . . . . .	49
XXIV.	Nût èrvî ko . . . . .	50
XXV.	'L kèmin è lon . . . . .	51
XXVI.	Sou k'èl Nût vo-z-a dnè . . . . .	52
XXVII.	Kè s' fuch in janviè . . . . .	53
XXVIII.	Insi l' Nût . . . . .	54
XXIX.	Sa fé k' si 'l Nût . . . . .	56
XXX.	D'é ko parti . . . . .	57



## II.

### El Kanson d' no vwa.

I.	El pu bèl kanson doj mont	61
II.	Vo-z-avè rinveyi lè mo	62
III.	Apèrdè...	63
IV.	A 'l lins !	65
V.	El plank	66
VI.	Vo poupa m'a di	68
VII.	Dju vouroû bi...	70
VIII.	Charlè Kin	71
IX.	Walon-pikâr	72
X.	Lè mo	73
XI.	Lè lèt	75
XII.	El preûmî sin'	77
XIII.	Lè vwa sonant	78
XIV.	El preûmî son	79
XV.	In kolé d' sonant : A	81
XVI.	Æ = è	82
XVII.	è	84
XVIII.	Æ èyè i	85
XIX.	i	86
XX.	ô	87
XXI.	œ = ou	88
XXII.	Ou	89
XXIII.	Ou	90
XXIV.	E = Eu	91
XXV.	Eu	92
XXVI.	U	93
XXVII.	Kouleûr dè vwa	94
XXVIII.	Lè twâ vèrdach	95
XXIX.	V	96
XXX.	V = U	97
XXXI.	Djeû d' no vwa, djeû d' no vîy	98
XXXII.	Lè 7 mèrvèy	100
XXXIII.	Lè 7 vwayèl, lè 7 konson'	102
XXXIV.	K, C, Q, G	103
XXXV.	K	104



XXXVI.	T, D.	105
XXXVII.	L è R	106
XXXVIII.	S	107
XXXIX.	S - Z	108
XL.	Ch - J	109
XLI.	F	110
XLII.	V	111
XLIII.	M - N	112
XLIV.	N	113
XLV.	N - H	114
XLVI.	Avû tou sa	115
XLVII.	On vo-z-a di	116

### III.

## El Djeù d' no sèt sin.

I.	A ku tou nu	121
II.	Vo vla skèpi	123
III.	El preùmî djoû	124
IV.	El preùmî sin	125
V.	O gran moncha	126
VI.	Twâzièm è katyèm sin	127
VII.	El jwin	128
VIII.	No bowèt	129
IX.	Kan 'l pèti kin	130
X.	Kan no-z-ouvron no-z-î	131
XI.	Fô bì deû mwa	132
XII.	Pou kouminchi	133
XIII.	Vîr klér	134
XIV.	I ya dè pti-z-èfan	136
XV.	L'èfan è soûr	137
XVI.	L'èfan intin	139
XVII.	Pindan dè mwa	141
XVIII.	Pa t' tavô 'l chanp	142
XIX.	Si on aroû markî	143
XX.	E dja sondjî	144
XXI.	Kan l'èfan va ranchné ô feû	146



XXII.	Fû...u, sa brûl ! . . . . .	147
XXIII.	No d'avon sèt . . . . .	148
XXIV.	Sè nî ko asè . . . . .	149
XXV.	Lè-z-ingrènâdch . . . . .	150
XXVI.	'L preûmî èy' èl deûzièm sin . . . . .	151
XXVII.	'L twâzièm èy èl katyèm sin . . . . .	152
XXVIII.	'L chonkièm sin . . . . .	153
XXIX.	'L djeu dou chonkièm sin . . . . .	154
XXX.	Deû vré pti-z-aparèy . . . . .	155
XXXI.	El lummiér fé dè-z-imâch . . . . .	156
XXXII.	O fon d' vo deû-z-î . . . . .	157
XXXIII.	Imâch dè Sin Nikola . . . . .	158
XXXIV.	Tireû d' portré d' dukas . . . . .	159
XXXV.	Pou dèvni rich, pou dèvni sâch . . . . .	160
XXXVI.	Kont dèl fèrnièt . . . . .	161
XXXVII.	Fok k'in idéy . . . . .	162
XXXVIII.	In pèrdan 'l gran ramon . . . . .	163
XXXIX.	'L kêr al dèblouk . . . . .	164
XL.	Sèt inmanchî . . . . .	165
XLI.	Mè vo sètièm... . . . .	166
XLII.	Din 'n trap . . . . .	167
XLIII.	Avû 's lavèt . . . . .	168
XLIV.	Kom in bouchî . . . . .	169
XLV.	Pèrdè vo pil, èm fi ! . . . . .	171
XLVI.	In Om . . . . .	172
XLVII.	Sèt dèsmanchî . . . . .	173
XLVIII.	D' tou s' ki è ô montreu dè Dieu . . . . .	174
XLIX.	Mét dou Mont . . . . .	176
	In mo dè rmèrsîmin . . . . .	177



Inprimè a L' Louviér,  
avû d' l'ink èyè dou papî d' gèr,  
in sètinp 1942.

Si plé-t-a Dieù k'on inprimis ko jamé  
lè « Di rimè »,  
fô spèré k'on fra mieù ;  
èyè, kom dè djus è dè rézon,  
i fôra dmandé 'l pèrmision  
ô sî ki lè-z-a skri,  
surtou si d'aroû yun  
k'aroû l'idéy d' dir èl minm,  
ôtrèmin k'in walon-pikâr.







